

DIDZA' DXI'A BUZÚAJĚ' MARCOS

*Libán benë' Juan, bönni' buquile' bönachi nisa
(Mt. 3:1-12; Lc. 3:1-9, 15-17; Jn. 1:19-28)*

¹ Caní gusí lo didza' dxi'a ca guca queë' Jesu-cristo, Zxí'inë' Dios.

² Budxín lë na' buzúajë' lu guichi Isaías, bönni' bë'ë didza' uláz queë' Dios, le gunnë' Dios:
Buyútsöca', risöl-la'a bönni' gubáz quia', inöruë'
Lo'.

Lë' upë'ë nöza ga tödu'.

³ Yön chi'ë tu bönni' ulidzë' zidzaj lu lataj cá'asö,
innë':

“Buli'pá'a nöza para idxín Xanru' yichaj lászdo'oli'.
Buli'béaj li yugu' nöza lasi ga tödë'.”

⁴ Caní budxín, tu' ruquile' Juan bönachi nisa lu
lataj cá'asö, en runë' libán para ila'dila bönachi
nisa, bönni' na' bulu'bí'i ládxi'gaquië' para uniti
lahuë' Dios dul-la' nabága'gaquië'.

⁵ Bila'rúaj bönachi zían yúgu'të yödzö luyú Judea,
enca' yödzö Jerusalén, en yójáquië' ga na' zoë' Juan,
ate' Juan na' buquile' légaquië' nisa lu yegu Jordán,
bönni' na' gula'xóalëpë' dul-la' nabága'gaquië'.

⁶ Nácuë' Juan lari' néquini lítsa'ba' böa', en
núguë'ë lë'ë tu guídi. Rahuë'-ba' böchi'zu, en re'jë'
le zxixi que buzdo'.

⁷ Runë' Juan libán, rnnë':

—Si' zë'ë bönni' tödi na'a, náparë' yöl-la' unná bë' ca neda'. Biti' naca' neda' lesaca' yéchia', para ilecja' xiráchuë' nudë'ë.

⁸ Neda' ruquila' libí'ili' nisa, pero Lë' gunë' le rulu'isö yöl-la' ridila nisa ni, uchízië' libí'ili' Dios Bö' Lá'ayi.

Ridilë' Jesús nisa

(Mt. 3:13-17; Lc. 3:21-22)

⁹ Tu dza ni' birúajë' Jesús yödzö Nazaret luyú Galilea, ate' Juan na' buquilë' Lë' nisa lu yegu Jordán.

¹⁰ Cate' burúajë' Jesús lu nisa, la' ná'asö bilé'enë' gualaj lúzhiba, en ruhuötjë' Dios Bö' Lá'ayi, rulu'í cuinë' ca tuba' gu'dödo', en bidisóalenë' Lë'.

¹¹ Biyön chi'i nu ruí'í didza' yehua' yubá, rnna: —Li' nacu' Zxí'ina'. Nadxí'ida' Li', en raza ládxa'a Li'.

Rë'ëni tu' xihui' gun ga ibáguë'ë Jesús dul-la'

(Mt. 4:1-11; Lc. 4:1-13)

¹² Ní'irö Dios Bö' Lá'ayi guchë'ë Jesús bayudxi lu lataj cá'asö.

¹³ Guzöë' Jesús lataj cá'asö na' idú choá' dza, ate' gú'uni Satanás tu' xihui' gun ga ibáguë'ë Jesús dul-la'. Guzöë' Jesús ga ni' ta'daba' böa' guixi' dzö'öba' guí'ado'. Yugu' gubáz lá'ayi queë' Dios gulácalenë' Jesús, en gula'gu'ë le gudahuë'.

Rusédinë' Jesús bönachi luyú Galilea

(Mt. 4:12-17; Lc. 4:14-15)

¹⁴ Gudödi gula'gu'ë Juan na' lidxi guíë, sa'yéajë' Jesús luyú Galilea. Runë' libán ni' que didza' dxi'a ca rinná bë'ë Dios.

¹⁵ Caní rnnë':

—Chibidxín dza. Chizóa idinná bè'ë Dios. Buli'bí'i ládxi'li', en guli'tséajlë' didza' dxi'a ni.

Rulidzë' Jesús tapë' bönni' uzxön böla

(Mt. 4:18-22; Lc. 5:1-11)

¹⁶ Tsanni ni' ridë' Jesús ra' nísado' luyú Galilea, bilé'enë' Simón len Andrés, bönni' böchë'ë Simón na'. Nácaqaquië' uzxön böla, en ta'chiljë' yöxaj böla quégaquië' lu nisa na'.

¹⁷ Jesús gudxë' légaquië', rnnë':

—Guli'dutá' neda', ate' guna' ga ichë'ëli' bönachi quia' neda', gunli' ca runli' rizönli'-ba' böla.

¹⁸ La' bulu'cá'anatë' yöxaj quégaquië', en sôjácalenë' Jesús.

¹⁹ Gudödë' Jesús ia'látido' ní'ilo, ate' bilé'enë' Jacobo, en Juan, yugu' zxi'inë' Zebedeo, nacu'ë lë'e bárcodo' quégaquië', tu'únë' yöxaj böla quégaquië'.

²⁰ Jesús la' bulidztë' légaquië', ate' bulu'cá'anë' xúzgaquië' Zebedeo, dzáguië' yugu' huen dxin queë' lë'e bárcodo' na', ate' sôjácalenë' Jesús.

Tu bönni' yu'u lë' bö' xihui'

(Lc. 4:31-37)

²¹ Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégaquië' bönni' judío, guyázië' Jesús yu'u ga tu'dubë' bönni' judío, en tu'sëdë' queë' Dios, ate' gusí lahuë' rusédinë' nupa nudúbigaca ni'.

²² Bulu'bánninë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi.

²³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' gurödxí'ë bönni' na', rnnë':

24 —¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbë'a Li', nacu' Bönni' Lá'ayi queë' Dios.

25 Jesús buzenë' le bach, rnnë':

—Busayaj ru'u, en burúaj lu bönni' ni.

26 Ní'irö bö' xihui' na' buxízida' bönni' na' yu'u lë', ate' gurödxí'a zidzaj, en la' burúajtë.

27 Bulu'bánninë' yúgu'të bönni' nacu'ë ni', ate' gula'nabi luzë'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë' rinná bé'enë' yugu' bö' xihui', ate' tun ca rnnë'!

28 La' guzëtë didza' que yöl-la' huáca queë' Jesús, ate' bila'yöni bönachi idútë luyú Galilea na'.

Ruúnë' Jesús xiná'anu nigula queë' Pedro

(Mt. 8:14-15; Lc. 4:38-39)

29 Ní'irö burúajë' Jesús lu yu'u ga na' tu'dubë' tu'sedë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés.

30 Ni' dënu xiná'anu nigula queë' Pedro, yú'unu tu xilá. La' gula'guíxjöi'itenë' Jesús ca raca queënu.

31 Ní'irö gubígui'ë Jesús, ate' gudélé'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

Ruúnë' Jesús zían nupa te'e

(Mt. 8:16-17; Lc. 4:40-41)

32 Cate' chiridzö', ca gudxía gubidza, la' du-juá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús.

33 Yúgu'të bönachi lu yödzö bila'guíró ga nu riyaza yu'u ga na' zoë' Jesús.

³⁴ Jesús bunë' zían nupa te'e, naca zían yödzhüé' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

³⁵ Zí'acado' guyasë' Jesús, ni' naca chul-la. Burúajë' yödzhüé' na', en sa'yéajë' tu lataj cá'asö, ate' ni' bulidzë' Dios.

³⁶ Simón, en nupa nacua'len lë' söjdíljagaquië' Jesús.

³⁷ Cate' yöjxáca'gaquië' Lë', të' Lë':

—Yúgu'të bönachi tu'guílaj Li'.

³⁸ Ní'irö Jesús gudxë' légaquië', rnnë':

—Uyéajru' yugu' dzaga yödzhüé', para guna' ca' libán ni'. Que lë' ni na' birúaja'.

³⁹ Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi

(Mt. 8:1-4; Lc. 5:12-16)

⁴⁰ Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yuë' lahuë', rnnë':

—Channö rë'ënu', huáca unu' neda'.

⁴¹ Jesús buéchi' ládxë'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuóacu'.

⁴² Ca gunné' ca', la' bunítitë huë' ré'enë', en böáquië' dxí'ado'.

⁴³ Ní'irö Jesús buzenë' bach bönni' na', en la' busöl-la'të' lë'.

44 Caní gudxë' lë':

—Cuntu nu guío' ca bena' quiu', pero guyéaj, yöjluí' cuinu' lahuë' bixúz, en yöjnödzej para le böácanu' li' que yudo' ca na' gunná bē'ë Moisés, lë na' ulu'í' bönachi chinuhuöácu'.

45 Burúajë' bönni' ni, en gusí lahuë' riguíxjöi'inë' bönachi zían ca guca queë'. Tu' buzë' didza' ni, bíti'rö guca tsázië' Jesús yálajdo' tu lu yödzö, pero guzóasë' ní'lö gapa naca lu lataj cá'asö. Bönachi yúgu'të yödzö bila'dxín ga na' zoë' Jesús.

2

Bönni' ré'enë' huë' nacú'unië' bin
(Mt. 9:1-8; Lc. 5:17-26)

1 Cate' chigudödi chopa tsonna dza, buázië' Jesús yödzö Capernaum, ate' guzë didza' zoë' yu'u.

2 La' bulu'dúbitë bönachi zían ga na' zoë' Jesús, ga bidxintë bíti'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'.

3 Ní'iro bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin.

4 Biti' guca ila'dxinë' lahuë' Jesús tu' nacuá' bönachi zían ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxíë' yeru na', ni' bulu'zötjë' le denë' bönni' huë' na'.

5 Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágu'u.

6 Rö'ögaquië' bal-lë' bönni' yudo' usedi ni'. Ta'zá' ládxi'gaquië', ta'nnë':

7 ¿Bizx que ru'ë caní didza' bönni' ni? Rucá'anë cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni.

8 La' gúquibe'etenë' Jesús le ta'zá' ládxi'gaquië', ate' gudxë' légaquië':

—¿Bizx que rizá' ládxi'li' caní?

9 Biti' naca böniga nu guiësö bönni' huë' ni chibuniti lo dul-la' nabáguë'ë, pero naca böniga nu gun ga huöásë', en u'ë le denë', en uzë'e ni'ë.

10 Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.

Ní'irö Jesús gudxë' bönni' huë' na':

11 —Li' rea': Guyasa. Buá' le denu', en böaj lidxu'.

12 La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacúa' ni'. Bulu'báninë' yúgu'të', en gula'gu'ë Dios yöl-la' ba, ta'nnë':

—Catu caz rilé'etu' le caní.

Jesús rulidzë' Leví

(Mt. 9:9-13; Lc. 5:27-32)

13 Burúajë' Jesús yödzö Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'.

14 Cate' ridödë' Jesús ni', bilé'enë' Leví, zxi'inë' Alfeo, rö'ë ga ruquíxjë' uláz que yödzö zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

15 Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö rő'ölengaquië' tsözxön Jesús, en yugu'

bönni' usëda queë'. Caní guca, tu' rōjaca bōnachi zián len Jesús.

16 Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rō'ë rágulenë' tsözxón yugu' bönni' uquízxaj, en ia'bal-lë' bönni' cá'asö, gulé' yugu' bönni' usëda queë' Jesús, ta'nnë':

—¿Bizxi caz runtsë'? ¡Rë'aj rágulentsë' yugu' bönni' uquízxaj, en ia'bal-lë' bönni' dul-la'!

17 Biyönnë' Jesús didza' ni tu'ë, en gudxë' légaquië':

—Nupa nacuá' dxi'a bití' naquíniguequi nu un bōnachi, pero nupa te'e naquíniguequi nu un bōnachi. Za'a neda', calëga dulídzagaca' bōnachi tsahui', pero rulídzagaca' bōnachi dul-la' para ulu'bí'íládxí'gaca.

*Ru'ë Jesús didza' que yöl-la' run gubasa
(Mt. 9:14-17; Lc. 5:33-39)*

18 Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' bití' tunë' gubasa?

19 Bubi'ë didza' Jesús, rë' légaquië':

—¿Naru' réquitseli' ilún gubasa nupa nacuá' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa.

20 Idxín dza cate' udúë' bönni' na' rutsaga në'ë, en bíti'rö sóalenë' légaquië', ate' dza ní'irö ilunë' gubasa.

21 'Cuntu nu bönni' udé'ë tu lari' cúbido' lu lari' chinatëbi, tu' utsupi' lari' cubi na', en huachöza' lari' tëbi na', ate' huaröza'rö lari' tëbi na'.

22 Lësca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

*Bönni' dá'gaquië' Jesús ta'lecjë' do dza lá'ayi
(Mt. 12:1-8; Lc. 6:1-5)*

23 Tu dza lá'ayi quégaquië' bönni' judío, gudödë' Jesús gapa dë yöla zxoá' xtila, ate' bönni' usëda queë' gula'sí lógaquië' ta'lecjë' do ga dxía zxoá' xtila.

24 Ní'irö bönni' yudo' fariseo gulë' Jesús, ta'nnë':
—Buyútsöca'. ¿Bizx que tunë' bönni' dá'gaquië' Li le cabí ral-la' gunru' dza lá'ayi?

25 Jesús gudxë' légaquië':
—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacué' len lë'

26 ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacué' lenë' lë'.

27 Ní'irö Jesús gudxë' légaquië':
—Dios benë' dza lá'ayi le ulu'zí' xibé bönachi, calëga benë' bönachi para ilún chí'i dza lá'ayi.

28 Que lë ni na', neda', Bönni' Guljë' Bönachi, naca' Xani dza lá'ayi.

3

Ruúnë' Jesús tu bönni' narequi' në'ë

(Mt. 12:9-14; Lc. 6:6-11)

¹ Leyúbölö guyu'ë Jesús tu lu yu'u ga tu'dubë tu'sedë' bönni' judío queë' Dios, ate' zoë' ca' ni' tu bönni' narequi' në'ë.

² Bönni' yudo' nacu'ë ni' tu'yúë' Jesús channö únë' bönni' na' dza lá'ayi, tu' té'ënnë' ulu'zégui'ë Lë' didza'.

³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisö bönachi ni'.

⁵ Ní'irö len yöl-la' rilé queë', buyúë' Jesús bönachi na' nacuá' gásibi'ilë'. Ruhuí'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no'ó.

Ní'irö bulí në'ë bönni' na', ate' böácatë dxí'ado' në'ë.

⁶ Ní'irö bulu'rúajë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu'dubi bönachi zían ra' nísado'

⁷ Buzë'ë Jesús ni' tsözxön len bönni' dá'gaquië' Lë', en bidxinë' ra' nísado', ate' sójácalen Lë' bönachi zían narúajgaca luyú Galilea, en luyú Judea.

⁸ Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzö

nacuá' idú gásibi'ilö ga nacuá' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús.

⁹ Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönachi zián na' Lë'.

¹⁰ Caní guca tu' chibunë' zián nupa te'e, ate' bila'guírö bönachi zián na' ga zoë' para ila'gán Lë'.

¹¹ Cate'bö xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

¹² Jesús buzenë' le bach bö' xihui' na', cabí ila'guixjö' nu náquië' Lë'.

Riböë' Jesús chinnu bönni' ilácagaquië' gubáz queë' (Mt. 10:1-4; Lc. 6:12-16)

¹³ Ní'irö gurenë' Jesús tu lu guí'ado', ga ni' bulidzë' nupa rë'ënë'. Gula'biguë'ë bönni' ni gásibi'ilë'.

¹⁴ Jesús bucu'ë chínnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán.

¹⁵ Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönachi.

¹⁶ Caní nácagaca lágaquië':

Simón, (buzóë' Jesús ia'tú lë', Pedro),

¹⁷ Jacobo,

Juan, (bönni' böchë'ë Jacobo, ate' nácagaquië' zxí'inë' Zebedeo. Chopë' ni, Jesús buzóë' ia'tú lágaquië', Boanerges, le rnna lu didza' xidza': Bönni' sínia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ruí'i ládxë'ë yödzo queë'),

¹⁹ Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u.

²⁰ Leyúbölö bila'guirö bönachi zían ga zoë' Jesús, ate' bitirö guta' lataj bi ilahuë' Jesús, en bönni' ná' dá'gaquië' Lë'.

²¹ Cate' di'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

²² Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

²³ Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'?

²⁴ Channö ila'rúaj choplö bönachi tu yödzo, en ila'díl-lalen luzé'eguequi, bití' gaca idía' yödzo na'.

²⁵ Lësca' caní channö ila'rúaj choplö bönachi nacua' tu yu'u, en ila'díl-lalen luzé'eguequi, bití' gaca ila'día' bönachi nacua' yu'u na'.

²⁶ Que lë ni na', channö Satanás tu' xihui' tá'baga' luzé'e, narúajgaca choplö bö' xihui'. Bití' gaca idía' yöl-la' unná bë' que, pero chizóa údxi que.

27 'Cuntu nu gaca tsu'u lidxë' tu bönni' nál-la, en cuéaj yöl-la' tshui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

28 'Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná,

29 pero nútí'tës nu innë schanní' queë' Dios Bö Lá'ayi, catu caz uniti lahuë' Dios nu na'. Tsaz nabaga' xíguia' nu na'.

30 Caní gunnë' Jesús tu' ta'nnë' queë' bönni' yudo' usedi na', ta'nnë':

—Tu' xihui' dzaga Lë'.

*Nu naca xinë'ë Jesús, en bönni' böchë'ë
(Mt. 12:46-50; Lc. 8:19-21)*

31 Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús.

32 Bönachi zían na' rö'gaca cuitë' Jesús gulë Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Li'.

33 Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

34 Ní'irö buyúë' nupa na' rö'gaca gásibi'ilë', rnnë':

—Buli'yútsöca'. Nupa ni nácgaca ca xiná'a, en yugu' bönni' böcha'a.

35 Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

4

*Rucúdzu'ë didza' Jesús ca naca queë' bönni' guz
(Mt. 13:1-9; Lc. 8:4-8)*

¹ Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ní', ate' yúgu'të bönachi na' gula'cuá' luyú ra' nisa na'.

² Zían le busédinë' Jesús légaquië', bucúdzu'ë didza'. Tsanni ní' rusédinë' légaquië', rnnë':

³ —Guli'zé nágalí' didza' ní. Birúajë' tu bönni' guz, sǒjësië' xisedo'.

⁴ Tsanni ní' rúsië', gulasi bal-la xisedo' na' ra' nõza, ate' bila'dxinba' biguínido', gulé'ajba' le.

⁵ Gulasi ia'bal-la xisedo' na' ga rǒ'ö guiǒj ga bití' rǒ'ö yenni' yu. Bayǒn gula'lén xisedo' na' tu' cabí rǒ'ö yenni' yu.

⁶ Ní'irǒ cate' gulén gubidza, buquexu' le, ate' gubidxi, tu' cabí nun luí ga rë'.

⁷ Gulasi ia'bal-la xisedo' na' ga tu'lén lubá yǒtsi'. Cate' gula'lén xisedo' na', bulu'lén ca' lubá yǒtsi' na', en gula'rǒli le, ate' lë na' bësië' bití' bi bunǒdzaj.

⁸ Gulasi ia'bal-la xisedo' na' ga naca luyú bëbu, ate' gula'zxon, en xitsá' ra' gula'bǒ'. Bulu'nǒdzaj lë na' bësië'. Tu dxigu' xisedo' na' bësië' bunǒdzaj ia'chí uruá' xisedo' ca'. Ia'tú bunǒdzaj ia'tsónnalalaj ca', ate' ia'tú na' bunǒdzaj ia'tú gayuá' ca'.

⁹ Ní'irǒ Jesús gudxë' légaquië', rnnë':

—Nu zoa nagui, en riyǒni ral-la' uzë nagui.

*Riguǒjǒ'ë Jesús bizx que rucúdzu'ë didza'
(Mt. 13:10-17; Lc. 8:9-10)*

10 Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxõn idxínnutë' bönni' usëda queë', ate' gula'nábinë' Lë' bi sa'yéaj lë na' bucúdzu'ë didza'.

11 Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' biti' nácagaca tuz len rë'u, ru'ilena' légaquië' didza' yugu' le rucúdzu'a didza'.

12 Caní runa' para gaca lë na' nazúaj lu guichi lá'ayi, rnna:

Ulu'yúë', en biti' ila'lé'enë'.

Ulu'zë nágagaquië', en biti' ila'yéajni'inë'.

Biti' ulu'bí'i ládxi'gaquië' para gaca uniti lahua' légaquië' ca naca dul-la' nabága'gaquië'.

Rigúxjö'ë Jesús le bucúdzu'ë didza'

(Mt. 13:18-23; Lc. 8:11-15)

13 Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ili' ia'zíca'rö le ucúdzu'a didza'?

14 Bönni' guz na' náquië' nu ruzë xtídzë'ë Dios.

15 'Nácagaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

16 'Nácagaca ia'bal-la bönachi ca xisedo' na' gulasi ga rö'ö guiöj. Ta'yönnë' didza' na', ate' len yöl-la' rudzeja quégaquië' ta'zi'ë le.

17 Biti' riyaza icja ládxi'do'gaquië', ate' tu chí'isö ta'dë'ë le. Cate' bi raca quégaquië', o zoa nu ribía ladxí' légaquië' tu' ta'dë'ë didza' na', la' tu'huöatë ládxi'gaquië'.

18 'Nácagaca ia'bal-la bönachi ca xisedo' na' gulasi ga na' tu'lén lubá yötsi'. Ta'yönnë' didza' na',

19 pero tu'í ládxi'gaquië' le nácagaca que yödzülió ni. Nazí' yé'eguequinë' tu' nadxí'iguequinë' yugu' yöl-la' tsahui', en ta'zë ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

20 'Nácagaca ia'bal-la bönachi ca xisedo' na' gulasí ga naca luyú bëbu. Ta'yönnë' didza' na', en ta'zí' lu ná'agaquië' le, ate' run dxin lu icja ládxi'do'gaquië'. Nácagaca bal-la bönachi caní ca xisedo' na' bulu'nödzej ia'chí uruá' huéaj. Nácagaca ia'bal-lë' ca xisedo' na' bulu'nödzej ia'tsónnalalaj ca', ate' nácagaca ia'bal-la bönachi ca xisedo' na' bulu'nödzej ia'tú gayuá' ca'.

Rucúdzu'ë didza' Jesús que tu le rigú'u bení'

(Lc. 8:16-18)

21 Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'.

22 Yúgu'të le nagachi' ilá' lahui, ate' yúgu'të le raca balándo'os ila'ruáj ga liná'.

23 Nu zoa nagui, en riyöni ral-la' uzë nagui.

24 Gudxë' ca' légaquië':

—Guli'güí ládxi'li' le riyönili'. Ca naca le ruríxili', la' leze urixë' Dios queëli', ate' gunnë' queëli' ia'lati'.

25 Nu nazí'i le za' que, gu'ë que ia'lati', pero nu bití' nazí'i le, la's dui le dë que, udúa.

Rucúdzu'ë didza' Jesús ca rizxõn zxoá' xtila

²⁶ Gunnë' ca' Jesús:

—Ca raca ni le rinná bē'ë Dios naca ca raca cate' ruchejē' tu bönni' zxoá' xtila lu yu.

²⁷ Chi'i dzõ'ölö rásiē', en riyasē' cate' za' rení'. Ta'lén zxoá' xtila na', en ta'zxõn, pero biti' nõzinē' lē' nacxi raca ta'zxõn.

²⁸ La' cuinsi luyú na' ruxõn le nadúzgaca luyú na', zí'alõ xiyazi, ní'irõ za' do que, en tõi na' cuía xui'i nál-la lu do que.

²⁹ Cate' chinal-la xui'i na', la' tséajtē' tsõjchibē' do na' tu' chibidxín dza uzi'ë xui'i.

*Rucúdzu'ë didza' Jesús ca raca que xisé mostaza
(Mt. 13:31-32; Lc. 13:18-19)*

³⁰ Gunnë' ca' Jesús:

—¿Bizxi caz innaru' ca raca ni le rinná bē'ë Dios?
¿Bizxi ucúdzu'ru' didza' ca raca?

³¹ Raca ca raca que tu xisedo' mostaza. Cate' riyaza luyú naca tu xisedo' nácatērõ cuidi' ca yúgu'tē xisedo' dzõ'õ luyú,

³² pero cate' chinadúz, rilén, en rizxõntērõ ca yúgu'tē guixi' cuan rõ'gaca luyú. Tsca run yana' ni'a nē'e, gaca ila'dxinba' biguínido', en ulu'dxíaba' xicá'agacaba' lu zxul-la que.

*Ca rugunē' dxin Jesús le rucúdzu'ë didza'
(Mt. 13:34-35)*

³³ Caní guca, busédinē' Jesús légaquiē', en ziánrõ ca' le bucúdzu'ë didza' tsca guca ila'yéajni'inē'.

³⁴ Yúgu'tē didza' bē'lenē' bõnachi bucúdzu'ë didza', ate' yúgu'tē didza' ni buchila lá'anē', buzéajni'inē' légacasē' bönni' usēda queē'.

Jesús ribequi dxíë' bö' budunu'

(Mt. 8:23-27; Lc. 8:22-25)

³⁵ La' dza ná'asö, cate' ridzö', Jesús gudxë' yugu' bönni' dá'gaquië' Lë', rnnë':

—Töditsöca'ru' ia'tsölá'a nísado' ni.

³⁶ Ní'irö bulu'lá'alene' bönachi zían nacuá' ni', ate' bulu'sé'ë bárcodo' ga na' chizóasë' Jesús. Gula'cuá' ca' ni' ia'zica'rö bárcodo' sójacalen légaquië'.

³⁷ Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'.

³⁸ Dë' rásíë' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¡Bönni' Usedi! ¿Naru' cabí ruí'i ládxi'tso' netu'? ¡Huáti caztu' lu nisa ni!

³⁹ Ní'irö guyasë' Jesús, en gunná bé'enë' bö' na' recja, gunné':

—Gurö'ö dxi.

Gudxë' ca' nisa na', gunné':

—Dxisö guzóa.

Gurö'ö dxi bö' na' guyecja, en guzóa dxi lu nísado' na'.

⁴⁰ Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzöbili' caní? ¿Naru' cabí réajlë'ëli' Dios?

⁴¹ Ni' tádxinë' gulé luzë'ë tuë' ia'tué':

—¿Nuzxi caz bönni' ni? ¡Tun bö' recja, en nísado' ca rnna xtídzë'è!

5

Bönni' Gadara yu'u bö' xihui' lë'

(Mt. 8:28-34; Lc. 8:26-39)

1 Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara.

2 Cate' burúajë' Jesús lë'e bárcodo' na', tu bönni' rirúajë' zخان bulóaj ga nacué' yeru ba la' dutságatë' Lë'. Bönni' ni yu'u bö' xihui' lë',

3 ate' nun xilatjë' ga na' nacué' yeru ba. Cuntu nu guca guga' bönni' na', calëga len du guié.

4 Zián luzuí bulu'zóë' bregui' guié yen në'ë, en ni'ë, en gulúgui'ë lë' du guié. Yugu' du guié na' bulë'ë, ate' bregui' guié na' guditsjë'. Biti' rizéqui'në' nu bönni' inná bé'enë' lë'.

5 Ridática'së' ribódxí'ë rëla, en të dza ga na' nacué' yeru ba, en gapa naca lu guí'ado', run huë' cuinë' yugu' lu guió'j dzö'ö ni'.

6 Cate' bilé'enë' zë'ë zí'tu' Jesús, guxíti'ë guyijë' ga na' zë'ë, ate' buzóa zxibë' lahuë' Lë'.

7 Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayépisëtërë'? Ni'a queë' Xanru' Dios ráta'yua' lo', bití' usaca' zí'u neda'.

8 Caní gunné' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

9 Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zián, tu' rö'ö ziantu'.

10 Gula'nabi yechi' yugu' bö' xihui' na' Jesús para cabí isöl-lë'ë lé'guequi zí'tu' luyú ni'.

11 Nacué'aba' cuchí zían lu guí'ado' ní'isö, ta'daba' táguba' ni'.

12 Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchi zián. Bë netu' lataj tsöjtsú'ugacatu'-ba'.

13 La' bë'të' Jesús léguequi lataj, ate' bila'rúaj bö' xihui' na', en yöjtsú'ugaca cuchi zián na', ate' gula'xíti'ba' cuchi zián na', yöjbíxigacaba' ga naca ra' guí'a, yöjcházagacaba' nísado'. Lu nísado' na' gula'yépi'ba' nisa, gulátiba', en náca'gacaba' ca galaj gayuá'aba'.

14 Ní'irö bulu'zxunnaj nupa ni' gulún chi'i cuchi zián na'. Yöjtíxjöi'iguequinë' bönachi lu yödzö ni', enca' bönachi nacuá' la' guixi' ni'. Bila'rúaj bönachi lu yödzö, söjyúgaquië' bizxi na' guca ni'.

15 Cate' bila'dxinë' ga ni' zoë' Jesús, bila'lé'enë' bönni' na' zí'alö yú'ugaca bö' xihui' lé'. Bönni' ni rö'ë ni', nácuë' lari', en zoë' dxí'ado', ate' guladxi bönachi na'.

16 Nupa na' bila'lé'e le benë' Jesús gula'guíxjöi'i bönachi na' bila'rúaj lu yödzö ca na' guca queë' bönni' na' zí'alö yú'ugaca bö' xihui' lé', enca' ca guca qué'gacaba' cuchi na'.

17 Ní'irö gula'sí lógaca bönachi zián na' ta'ta'yu lahuë' Jesús urúajë' lu xiyúguequi.

18 Cate' bubenë' Jesús lë'e bárcodo', bönni' na' zí'alö yú'ugaca bö' xihui' zián lé', gúta'yuë' lahuë' Jesús gu'ë lé' lataj tséajlenë' Lë'.

19 Jesús biti' bë'ë lé' lataj, pero gudxë' lé':

—Böaj lidxu'. Yöjtíxjöi'i dí'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a lí'.

20 Söhuöjë' bönni' na', en ruzë' didza' yugu' yödzö Decápolis ca náca'gaca le zxön benë' Jesús queë', ate' bulu'bani yúgu'të bönachi nacuá' yugu' yödzö ni'.

Bi'i nigula queë' Jairo, en nigula na' gudannu lari' nácuë' Jesús

(Mt. 9:18-26; Lc. 8:40-56)

²¹ Cate' budxinë' Jesús ia'tsölá'a nísado' na', ní'irö bulu'dubi bönachi zián ga na' zoë' ra' nísado'.

²² Bönni' lë' Jairo, bönni' rinná bē'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zxibë' lahuë',

²³ en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóacabi', en biti' gátibi'.

²⁴ Sa'yéajlenë' Jesús lë', ate' bönachi zián sōjácalen Jesús, tu'quirö Lë'.

²⁵ Tu nigula, chinaca chinnu iz ré'enu, zóanu ca' ni'. Biti' ruhuí'i rön queënu que huë' quégaca cázanu nigula.

²⁶ Yenni' chigudí'i guzxáca'nu lu ná'agaquië' zián bönni' tu'únë' bönachi. Nítisö chibutönu dëra le dë queënu, tu' cabí bi gúcalen lënu, pero riyali' queënu.

²⁷ Cate' biyöninu tuí'i didza' bönachi ca naca queë' Jesús, gudödinu ládjalö bönachi zián na', en bidxinnu zaca' cúdzu'lë' Jesús, en gudannu lari' nácuë'.

²⁸ Caní bennu tu' rnnanu: “Channö cansa' le nácuë', huóaca'.”

²⁹ La' buí'të rön queënu, ate' réquibe'enu chibóácanu que le guca queënu.

³⁰ La' gúquibe'etenë' Jesús ben dxin yöl-la' huáca queë', ate' buécjë', ruyúë' bönachi zián na'. Rnnë':

—¿Nuzxi na' gudán neda'?

³¹ Ní'irö bönni' dá'gaquië' Lë' tē' Lë', ta'nnë':

—Rilé'e quézinu' bönachi zián ni tu'quirö Li', en rnnatso': "¿Nuzxi na' gudán neda'?"

³² Ruyüë' Jesús gásibi'ilë' para ilé'enë' nuzxi na' gudán Lë'.

³³ Ní'irö nigula na' gubíga'nu lahuë'. Rádxinu, en rixízinu tu' chinózinu bí na' guca queënu, ate' buzóa zxíbinu lahuë' Jesús, en gúdxinu Lë' idútë le nácatë.

³⁴ Jesús rë'ë-nu:

—Nigúlado'. Chiböácu' tu' réajlë'u neda'. Böaj lidxu' idú ládxi'u. Tsaz nuhuöácu' que le guca quiu'.

³⁵ Tsanni ni' ru'ë caní didza' Jesús, bönni' narúajgaquië' lidxë' bönni' na' rinná bë'ë lu yu'u ga tu'dubë' tu'sëdë' queë' Dios bila'dxnë' ni', en të' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

³⁶ Biti' bë' ládxi'ë Jesús lë na' ta'nnë', ate' gudxë' bönni' unná bë' na', rnnë':

—Biti' gádxinu'. Guyéajlë'ësë' Dios.

³⁷ Biti' bë'ë lataj Jesús tsöjácálen Lë' ia'zíca'rö bönachi, pero légacasë' Pedro, en Jacobo, en Juan, böchë'ë Jacobo na'.

³⁸ Cate' bidxinë' lidxë' bönni' na' rinná bë'ë ga tu'dubë' tu'sëdë' queë' Dios, bilé'enë' raca dzatsa, enca' nupa ni' ta'bödxí, en nupa ta'bödxí yechi'.

³⁹ Guyázië' Jesús, en gudxë' légaquië':

—¿Bizx que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

⁴⁰ Ní'irö bulu'titjë' Jesús, pero Lë' bubéajë' yúgu'të bönachi na' ní'ilö, ate' guchë'ë xuz xiná'abi'

bi'i nigúlado' na', enca' nupa nacuá'len Lë', ate' guyázië' ga na' dëbi'.

⁴¹ Gudëlë'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rna lu didza' xidza': Bi'i nigúlado', guyasa.

⁴² La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacuá' ni'.

⁴³ Ní'irö Jesús gunná bé'enë' légaquië' cuntu nu ulu'siyönnë' lë na' guca. Gudxë' légaquië':

—Guli'güí le gágubi' bi'i nigúlado' ni.

6

Ridxinë' Jesús Nazaret, le naca ladzë'

(Mt. 13:53-58; Lc. 4:16-30)

¹ Buzé'ë Jesús ni', budxinë' ladzë', ate' yugu' bönni' dá'gaquië' Lë' sōjácalenë' Lë'.

² Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sëdë' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizëdë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácagaca bë' na' zá'gaca yehua' yubá?

³ Náquië' bönni' ni gubëdxi yaga na', en xzí'ininu María. Náquië' böchi'gaquië' Jacobo, en José, en Judas, en Simón. Nigula zanë' nacuá'lennu ca' rë'u.

Que lë ni na' bulu'cá'anë' Lë' cá'asö.

⁴ Ní'irö Jesús gudxë' légaquië', rnnë':

—Gátitës tunë' bal nu bönni' ru'ë didza' uláz queë' Dios, pero bönachi uládz queë', en bönachi

di'a dza queë', en bönachi nacua' lidxë' biti' tun lë bal.

⁵ Que lë ni na' biti' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi.

⁶ Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzödo' nacua' gásibi'ilö, rusédinë' bönachi ni'.

Risöl-lë'ë Jesús bönni' dá'gaquië' Lë' tsöjéngaquië' libán

(Mt. 10:5-15; Lc. 9:1-6)

⁷ Ní'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopá huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi.

⁸ Gunná bé'enë' légaquië' biti' bi ilu'ë la' nöza, calëga yöxaj, calëga yöta, en calëga dumí biti' ila'gu'ë lu buzudi quégaquië', pero iluá'asë' xiyágado'.

⁹ Ral-la' ulu'dë'ë xiráchugaquië', pero calëga chopá lari' ulu'xóá yéngaquië'.

¹⁰ Gudxë' ca' légaquië':

—Gátí'tës ga tsú'uli' tu yu'u, guli'sóa yu'u na' cate' uzá'aröli' yödzö na'.

¹¹ Channö tsú'uli' tu yödzö ga biti' ilún bönachi lu yödzö na' libí'ili' bal, en biti' ulu'zë' nágagaquië' xtídzá'li', buli'rúaj ni', en buli'quínnaj bëchtö da' lë'e lábali'. Lë ni gaca bë' nabága'gaquië' xíguia'. Le nácatë' rea' libí'ili', cate' idxín dza ichúguië' Dios quégaca bönachi, ila'guí'ila'zaca'rö bönachi lu yödzö na' ca ila'guí'ila'zaca' bönachi Sodoma, en Gomorra, yugu' yödzö na' busunítië' Dios.

12 Ní'irö bila'rúajë' bönni' dá'gaquië' Lë', yöjéngaquië' libán ca ral-la' ulu'bí'i ládxi'gaca bönachi.

13 Bulu'béajë' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquië'.

Ca bëtigaquië' Juan, bönni' buquilë' bönachi nisa (Mt. 14:1-12; Lc. 9:7-9)

14 Biyönnë' Herodes, bönni' unná bë', ca naca le runë' Jesús, tu' rizé didza' gáti'tës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquilë' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

15 Ia'bal-la bönachi ta'nná:

—Naquië' Elías, bönni' bë'ë didza' uláz queë' Dios dza ni'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

16 Cate' biyönnë' Herodes yugu' lë ni, gunné':

—Naquië' Juan, bönni' na' burixa' yenë'. Chibubanë' lu yöl-la' guti.

17 Caní gunné' Herodes tu' gusöl-lë'ë lë cazë' bönni' yöjxóngaqië' Juan na', ate' gulúgui'ë lë' du guië lu yu'u lidxi guië. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böchë'ë Herodes na'. Herodes gudüë'-nu Herodías na', en butsağa ná'alënë'-nu.

18 Juan na' gudxë' Herodes:

—Biti' ral-la' sóalenu'-nu nigula queë' böchu'u.

19 Que lë ni na' gusí gurö'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxéqui'nu

20 tu' rádxinë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chi'ë lë', en buzë náguië' lë' idú ládxe'ë sal-la' lë na' rnnë' Juan ben ga gurö'ë böniga Herodes na'.

21 Ní'irö bidxín tu dza guzxéqui'nu Herodías na', le naca dza runë' Herodes laní que dza guyé'enë' iz. Bupë'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' röjáquië' gudil-la, enca' bönni' nácagaquië' lo luyú Galilea.

22 Guyázabi' bi'i nigula queënu Herodías ga na' të'aj tahuë', en buyá'abi' lógaquië'. Guyaza ládxe'ë Herodes ca runbi', en gula'yaza ládxi'gaca ca' nupa të'aj tágulen lë'. Ní'irö Herodes gudxe'-bi' bi'i nigula na', gunné':

—Gunaba bi ré'ënu' gunna' quiu', ate' guna' ca'.

23 Benë' tsutsu xtídzë'ë, gudxe'-bi':

—Ni'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bë'a.

24 Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönachi nisa, inabu'.

25 La' buázatëbi' ga na' zoë' Herodes, en rëbi'-në':

—Rë'ënda' ixú' quia' na'a lu zxiga' zxön icjë' Juan, bönni' na' buquilë' bönachi nisa.

26 Ní'irö buí'innë' Herodes, pero tu' buzötjë' Dios, en tu' bila'yöni ca' nupa tágulen lë', bíti' gú'unnë' initi xtídzë'ë na' guzxí' lu në'ë queébi'.

27 Herodes la' gusöl-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan.

28 Bönni' na' rejë' gudil-la guyijë' lidxi guïë, yöjrixë' yen Juan na', ate' bu'ë icjë', nuxóë' le tu lu zxiga' zxön. Budödë' le lu ná'abi' bi'i nigula na', ate' lëbi' bunödzbabi' le queënu xiná'abi'.

29 Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjcáchi'gaquië' lë' yeru ba.

*Rugahuë' Jesús zíanrö ca chi-un gayuá' bönachi
(Mt. 14:13-21; Lc. 9:10-17; Jn. 6:1-14)*

30 Gudödi ni' bulu'dübë' bönni' gubáz queë' Jesús ga zoë', en gula'guíxjöi'inë' Lë' yúgu'të le gulunë', en yugu' le bulu'sëdinë' bönachi.

31 Nacuá' bönachi zían ni', nupa zá'gaca, en nupa søjaca, ga bidxintë bítirö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Guli'dá. Uyéaj cázaru' ga naca lataj cá'asö, en uzi' ládxi'ru' tu chi'i.

32 La' légacasë' yöjáquië' tu lë'e bárcodo', ate' bila'dxinë' tu lataj cá'asö.

33 Bila'lë'e bönachi zían légaquië' søjáquië' ni', en núnbë'gaca Jesús. Que lë ni na' bönni' yúgu'të yödzö ni' carelö yöjáquië' ni'. Gula'zë'e ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'.

34 Cate' burúajë' Jesús lë'e bárcodo' na', bilé'enë' bönachi zían na', ate' buéchi' ládxi'ë légaquië' tu' nácagaquië' ca bö'cu' zxíla'do' bití' zoa nu gapa chi'i légacaba'. Gusí lahuë' rusëdinë' légaquië' le zían.

35 Cate' chiridzö' dza na', yugu' bönni' dá'gaquië' Jesús bila'dxinë' ga zoë', en tē' Lë':

—Chiridzö', ate' lataj cá'asö naca ni.

³⁶ Busöl-la' bönachi zián ni para tsöjaca yugu' yú'udo', en yugu' yödzödo' nacua' gásibi'ilö, tsöj'ugaca yöta, tu' cabí bi dë ni le ilagu.

³⁷ Bubi'ë didza' Jesús, gudxë légaquië':

—Guli'gü' libí'i cázali' le ilahuë'.

Gulë' Lë':

—¿Naru' tsöj'ö'utsatu' yöta xtila len lázxjatu' que idú xunu' beo', ate' gü'itu' le ilahuë'?

³⁸ Jesús gudxë légaquië':

—¿Bal-laxi yöta xtila dë queëli'? Guli'tsöjyútsöca'. Cate' chinöziguequinë', të' Lë':

—Gáyu'sö yöta xtila dë, en chópasöba' böla dëba'.

³⁹ Ní'irö gunná bë'ë Jesús ilunë' ga ila'bö' bönachi zián na', ila'cuá' tu cö' huéajguequi ga naca lachi' lu daca'.

⁴⁰ Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'.

⁴¹ Ní'irö gudélë'ë Jesús igáyu'të yöta xtila na', en irópaba' böla na'. Buyüë' zaca' lúzxiba, en gudxë Dios: "Xclenu'." Ní'irö buzuxzjë' yöta xtila na', en bë'ë quégaquië' bönni' usëda queë' para ila'guisië' quégaca bönachi zián na'. Gudísië' ca' irópatëba' böla na' quégaca yúgu'të bönachi na'.

⁴² Gulahuë' yúgu'të', en bulu'huöljanë'.

⁴³ Ní'irö bulu'tübë' le bizxaj que yöta xtila na', en quégacaba' böla, ate' chinnu ga'böra bulu'lié'.

⁴⁴ Guláquië' ca chi-un gáyu'ë bönni' na' gulahuë'.

Riz'e ni'ë Jesús lu nísado'

(Mt. 14:22-27; Jn. 6:16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nóruë' lahuë', ila'dödë' lu nísado' na', para ila'dxinë' lu yödzö

Betsaida, tsanni ni' Lë' rusöl-lë' bönachi zián na' lídxiguequi.

⁴⁶ Cate' chibudxi busöl-lë' légaquië', guyijë' tu lu guí'ado', ate' ni' ruí'ilenë' Dios didza'.

⁴⁷ Cate' chizá' ral-la, zeaj bárcodo' na' gatsaj láhui'lö nísado', ate' zoë' Jesús tuzë' luyú bidxi na'.

⁴⁸ Bilé'enë' Jesús légaquië', böniga tu'së'ë bárcodo' na' tu' recja bö' za' ga na' ta'dödë'. Gudödi gu-luhuëla bidxinë' Jesús ga na' nacu'ë, rizë'e ni'ë lu nísado' na', ate' gú'unnë' tödisë' ga na' nacu'ë.

⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxi'ë

⁵⁰ tu' bila'lé'enë' yúgu'të' Lë', en guladxi gula'dzöbinë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

⁵¹ Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíqui'sinë' bulu'báininë'.

⁵² Biti' ta'yéajni'ininë' le ruluí'i lë na' benë' Jesús que yöta xtila na'. Ni' naca zidi icja ládxi'do'gaquië'.

*Ruúnë' Jesús nupa te'e lu yödzö Genesaret
(Mt. 14:34-36)*

⁵³ Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'.

⁵⁴ Cate' bulu'rúajë' lë'e bárcodo' na', la' bulu'únbë'të bönachi ni' Jesús.

⁵⁵ Gula'xiti' bönachi na', yöjaca yúgu'të yödzödo' idú gásibi'ilö, en gula'sí lógaquië' dujuá'agaquië'

yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gátitës ta'yönnë' zoë' Jesús.

⁵⁶ Gátitës ga ridödë' Jesús, yugu' lu yödzödo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yë'ëyi, en ta'tá'yuë' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huóácatë dxí'ado'.

7

Le tun ga bití' náca gaca bönachi tsahui' lahuë' Dios (Mt. 15:1-20)

¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús.

² Bönni' yudo' ni bila'lé'enë' bönni' usëda queë' Jesús tahuë' yöta, bití' nuchí'agaquië' ná'agaquië', lë na' rnna: Bití' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quégaquië'.

³ Yugu' bönni' yudo' fariseo na', en ia'zica'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', bití' ca' tahuë'.

⁴ Cate' tu'dxinë' röjö'ugaquië' lu yë'ëyi, channö cabí ta'guibë' lë na' ca nalëbiguequinë' tunë', bití' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' zxiga' yö'öna, en yugu' zxiga' guíë, en yugu' le táti'në'.

⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yöta bití' nuchí'agaquië' ná'agaquië'?

⁶ Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácatë le gudí'xjö'ë Isaiás, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunné': Yugu' bönni' ni, len rú'agacasë' tunë' neda' bal, calëga idú ládxi'gaquië'.

⁷ Ní'tisö naca yöl-la' ba ta'gu'ë neda' tu' tu'sëdinë' le ta'nná bë' bönachi, calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazi' láhuili' lu ná'agaca bönachi.

⁹ Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'.

¹⁰ Moisés gunné' caní: “Ben bal xuz xinó'o.” Gunnë' ca': “Nu ulidza zi' xuzi o xinë'e, guli'gútité nu na'.”

¹¹⁻¹² Libi'ili' rnnali' caní: “Channö nu bönni' guié' xuzë' o xinë'ë: Biti' gaca bi gunna' queëli', tu' naca Corbán.” (Didza' ni rna lu didza' xidza': Tu' nuzóa' quez queë' Dios yúgu'të.) Ní'irö rnnali': “Biti' run bayudxi bi gunë' bönni' na' quégaquië' xuz xinë'ë.”

¹³ Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudódili' lu ná'agaca zxi'ini xi'sóali'. Ziánrö ca' le caní runli'.

¹⁴ Ní'irö Jesús bulidzë' bönni' zián na' nacu'ë ni', en rë' légaquië':

—Guli'zë' nágali' didza' gu'a, yúgu'tëli', en guli'tséajni'.

15 Biti' bi dē le riyaza nu bōnni' le gaca gun ga biti' náquiē' tsahui' lahuē' Dios, pero le rirúaj lē', lē ni gaca gun ga biti' náquiē' tsahui' lahuē' Dios.

16 Channō zoa nágali', en riyōnili', buli'zē nágali'.

17 Cate' Jesús bulá'alenē' bōnachi zián na', guyu'ē tu yu'u, ate' yugu' bōnni' usēda queē' gula'nábinē' Lē' ca naca lē na' bucúdzu'ē didza'.

18 Jesús gudxē' légaquiē':

—¿Riyádzjatsō ca' queēli' yōl-la' réajni'i? ¿Naru cabí réajni'ili', yúgu'tē le riyaza nu bōnni', biti' gaca gun ga biti' náquiē' tsahui' lahuē' Dios?

19 Naca caní tu' cabí riyaza icja ládxi'da'ahuē', pero lē'ēsē' riyaza, ate' rurúaj lē'ē.

Tu' gunnē' caní Jesús, buluí'inē' rē'u naca dxi'a yúgu'tē le rē'aj ráguru'.

20 Gunnē' ca' Jesús:

—Le rirúaj lu bōnni' run ga biti' náquiē' tsahui' lahuē' Dios.

21 Caní naca, tu' ta'rúaj icja ládxi'do'gaquiē' bōnni' yugu' le ta'zá' ládxi'gaquiē' le naca xihui', yugu' le tun ga tunē' dul-la' ta'guitsjē' xibá que yōl-la' nutsaga na', en yugu' le ruá' dō'. Tun ga tútiē' bōnachi,

22 en ta'banē', en ta'zē ládxi'gaquiē' le dē que luzá'agaquiē', en tu'ē dō', en ta'zi' yē'ē, en tu'zxē'ē, en ta'nná zi'ē que luzá'agaquiē', en tun ba zxōn cúngaquiē', en tunē' le canōz.

23 Yúgu'tē le xihui' caní ta'rúaj icja ládxi'da'ahuē' nu bōnni', en tun ga biti' náquiē' tsahui' lahuē' Dios.

*Tu nigula izá'a réajlē'ēnu Jesús
(Mt. 15:21-28)*

24 Buzé'ë Jesús ni', ate' bidxiné' gala' ga nacua' yödzö Tiro, en yödzö Sidón. Guyázié' tu yu'u ni', en gú'unné' cuntu nu inözi, pero biti' ca' guca ucachi' cuinë'.

25 Tu nigula zóabi' bi'i nigúlado' queënu, yu'u bö' xihui' lëbi', biyöninu didza' rizé ca naca queë' Jesús, ate' la' bídatënu ga zoë' Jesús, en buzóa zxi'binu xini'ë.

26 Nigula ni biti' nácanu judío, pero nabábanu bönachi Sirofenicia. Gúta'yunu lahuë' Jesús ubéajé' bö' xihui' na' yu'u-bi' bi'i nigúlado' queënu.

27 Ní'irö Jesús gudxë'-nu, rnnë':

—Bë' lataj ulu'huölaj zí'alö nupa nácgaca ca zxi'ini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lógacaba' bö'cu'do'.

28 Bubi'ínu didza' nigula na', gúdxinu Jesús:

—Ön, Xan, pero yugu' bö'cu'do' nacua'aba' zxani ga tágubi', táguba' le bizxaj tu'huöxaj ga na' tágubi'.

29 Ní'irö Jesús gudxë'-nu, rnnë':

—Tu' gunnó' caní, huáca huöaju'. Chiburúaj bö' xihui' na' guyú'u-bi' bi'i nigúlado' quiu'.

30 Cate' budxinnu lídxinu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' guyú'u lëbi'.

Jesús ruúnë' tu bönni' nacödzuë', en biti' gaca innë'

31 Burúajé' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxiné' ra' nísado' lu xiyú Galilea.

32 Bönachi ni' dujuá'gaca tuë' bönni' nacödzuë', en biti' raca innë' ga zoë' Jesús, ate' ta'ta'yu lahuë' Jesús ixóa në'ë lë'.

³³ Jesús bubéajë' lë' tsölá'alö ladjagaca bönachi na', ate' bunë'ë xibõn në'ë yeru náguië' bönni' na'. Gurú'unë' zxõna'do', en gudanë' lúdxë'ë.

³⁴ Ní'irö buyúë' lúzxibälö, en gunné lúdxë'ë, rnnë':

—Efata.

Didza' hebreo ni rna lu didza' xidza': Guyalaj.

³⁵ La' böäljatë náguië', en la' buguítjatë lúdxë'ë, en gunnë'të' dxí'ado'.

³⁶ Jesús gunná bé'enë' légaquië' cuntu nu ilë' ca', pero tsca gunná bé'enë' légaquië', bulu'zëtë'rë' ca' didza' que lë na' benë'.

³⁷ Bulu'bánnë, ta'nnë':

—Tsáhu'i'do' runë' yúgu'të. Runë' ga tu'yöni nupa gulaca cödzu, en ga tuí'i didza' nupa bití' guca ila'nnë.

8

Rugahuë' Jesús zíanrö ca choá' gayuá' bönachi (Mt. 15:32-39)

¹ Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bë'lenë' légaquië' didza'.

² Gudxë' légaquië':

—Ruhuechi' lúdxá'a bönachi zían ni tu' chinaca tsonna dza nacuá'len neda' ni, en bití' dë le ilágugaca.

³ Channö usöl-la'a léguequi lídxigaca ta'dunsö ca', huala'cuídi' la' nöza, tu' zá'gaca zítu' bál-lagaca.

⁴ Bulu'bi'ë didza' bönni' usëda queë', të' Lé':

—¿Bizxi ugágutsaru' bönachi guizxi yu ni, ga ni naca lataj cá'asö?

⁵ Gunábinë' Jesús légaquië', rnnë':

—¿Bál-laxi yöta xtila dë queëli'?

Të' Lë':

—Gádxisö.

⁶ Ní'irö Jesús gunná bé'enë' bönachi zián na' ila'bö' lu yu. Gudélë'ë gadxi yöta xtila na', ate' gudxë' Dios: "Xclenu'." Ní'irö buzzuzxjë' léguequi, en bë'ë quégaquië' bönni' usëda queë' para ila'guisië' lógaca bönachi zián na'.

⁷ Guta' ca' quégaquië' tu chópaba' böla cuidi'. Jesús gudxë' Dios: "Xclenu'", ate' gunná bé'enë' légaquië' ila'guisië' ca' légacaba' lógaca bönachi.

⁸ Gulagu yúgu'të bönachi na', en bulu'huöläj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra.

⁹ Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca,

¹⁰ ate' gurenë' lë'e bárcodo' tsözxön len yugu' bönni' usëda queë', ate' bila'dxinë' lu xiyúgaca bönachi Dalmanuta.

Ta'nábinë' Jesús gunë' tu le gaca bë' nuzxi náquië' (Mt. 16:1-4; Lc. 12:54-56)

¹¹ Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulë'ënnë' ila'zí' bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá.

¹² Gunnëda' ládxë'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', biti' ca' ilé'eli' tu le naca bë' za' yehua' yubá.

¹³ Ní'irö bulá'alënë' légaquië'. Bubenë' lë'e bárcodo', en sa'yéajë' ia'tsölä'a nísado'.

Le tu'sëdinë' bönni' yudo' naca ca cúa zi que yöta xtila

(Mt. 16:5-12)

¹⁴ Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'.

¹⁵ Ní'irö Jesús buzéajni'inë' légaquië', rnnë':

—Buli'yütsöca' queëli'. Guli'gün chi'i cuinli' para cabí'sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

¹⁶ Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

¹⁷ Réquibe'enë' Jesús le ta'nnë', ate' rë' légaquië':

—¿Bizx que ruí'ili' caní didza' tu' cabí dë yöta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja ládxi'do'oli'?

¹⁸ ¿Zóatsö guiöj loli', en bití' rilé'eli', en zóatsö guídi nágali', en bití' riyönili'? ¿Naru' cabí röjnétseli'?

¹⁹ Cate' ni' buzzuxxja' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

²⁰ Gunnë' ca' Jesús:

—Cate' ni' buzzuxxja' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

²¹ Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sëdinë' bönni' na'?

Jesús ruínë' bönni' Betsaida nachul-la lahuë'

²² Cate' Jesús, en bönni' dá'gaquië' Lë' bila'dxinë' yödzo Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yue' lahuë' canë' bönni' na'.

²³ Jesús gudélé'ë në'ë bönni' na' nachul-la lahuë', ate' guchë'ë lë' ní'lö ra' yödzo. Ni' budxië' zxöna' guiöj lahuë', en guxóa në'ë lë'. Ní'irö gunábinë' lë', rnnë':

—¿Ba rilé'enu' lati'?

²⁴ Buyüë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

²⁵ Leyúbölö guxóa në'ë Jesús guiöj lahuë', ate' buyüdë'ë bönni' na' nachul-la lahuë', ate' böácate' dxí'ado' guiöj lahuë'. Na'a rilé'enë' dxí'ado' yúgu'të.

²⁶ Ní'irö Jesús gusöl-lë'ë lë' lidxë', rnnë':

—Biti' tsöjdo' lahui' yödzo, en cuntu nu guío' le bena' nu zoa lu yödzo ni.

Rnnë' Pedro: "Jesús náquië' Cristo"

(Mt. 16:13-20; Lc. 9:18-21)

²⁷ Gudödi na', bulu'zë'ë Jesús, en yugu' bönni' usëda queë' ni', ate' gula'dödë' yugu' yödzo' nabábagaca Cesarea, ga na' rinná bë'ë Filipo. Tsanni ni' yú'ugaquië' nöza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

²⁸ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquile' bönachi nisa. Ta'nná ia'bal-la nacu' Elías, bönni' bë'ë didza' uláz queë' Dios dza ni'te. Ta'nná

ia'bal-la nacu' bönni' yúbölö bë'ë didza' uláz queë'
Dios dza ni'te.

²⁹ Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ë didza' Pedro, rnnë':

—Li' nacu' Cristo.

³⁰ Ní'irö Jesús gunná bé'enë' légaquië' cuntu nu
ulu'siyönnë' Nu náquië'.

Rigúxjö'ë Jesús ca si' ilútië' Lë'

(Mt. 16:21-28; Lc. 9:22-27)

³¹ Ní'irö gusí lahuë' Jesús rusëdinë' bönni'
dá'gaquië' Lë', rnnë':

—Run bayudxi qui'i saca'a neda', Bönni' Guljë'
Bönachi. Bönni' gula tu'zëajni'inë', en yugu' bixúz
unná bë', en bönni' yudo' tu'sëdinë' ulu'zöë' neda'
tsölá'alö. Ilútië' neda', pero cate' gaca tsonna dza
ubana'.

³² Yálajsö bë'lenë' légaquië' didza' ni. Ní'irö Pedro
guchë'ë Jesús tsölá'alö, en gusí lahuë' ridil-lë' lë'
didza'.

³³ Buécjë' Jesús, en buyúë' ia'zíca'rë' bönni' usëda
queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'.
Le rizá' láchxu'u bití' za' lu në'ë Dios, pero ca ta'zá'
láchxi'gaca bönachi naca.

³⁴ Ní'irö Jesús bulidzë' yugu' bönni' usëda queë',
enca' bönachi nacuá' ni', en gudxë' légaquië':

—Channö rë'ënë' nu bönni' të'ë neda', ral-la'
uzöë' tsölá'alö le rë'ëni quézinë', en gáquië' ca tu
bönni' sa'yéajë' söjtë'ë lë'e yaga cruz, ate' ní'irö
huáca të'ë neda'.

³⁵ Nu bönni' ruí'ida' láchxë'ë yöl-la' na'bán queë',
unítie' le, pero nu bönni' unítie' yöl-la' na'bán queë'

tu' dë'ë neda', o tu' dë'ë didza' dxi'a quia', udéli'në' bönni' ni yöl-la' na'bán queë'.

³⁶ ¿Naru' uzi'tsë' xibé tu bönni' channö utubë' yúgu'të le dë yödzülió ni, pero uniti cuinë'?

³⁷ Biti' bi gaca unödzjë' tu bönni' le huóá'ui cuinë'.

³⁸ Channö zoë' nu bönni' rutuí'inë' quia' neda', en que xtídza'a lógaca bönachi ni nucá'anagaca Dios, en tun dul-la', lësca' caní neda', Bönni' Guljë' Bönachi, utuí'ida' queë' bönni' na' cate' guídalena' yöl-la' huáca zxon queë' Xuza', ate' dzágagaquië' gubáz lá'ayi neda'.

9

¹ Jesús gudxë' ca' légaquië', rnnë':

—Le nácatë rea' libí'ili', nacuá' ni nupa bití' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxon queë'.

Ridzá'a ca riná' lahuë' Jesús
(Mt. 17:1-13; Lc. 9:28-36)

² Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yöjáquië' tu lu guí'a sibi. Ni' bidzá'a ca riná' lahuë' Jesús lógaquië' yonnë' na'.

³ Guyëpi yösa bení' lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödzülió ni gaca gun chiguíchido'os ca guca lari' na'.

⁴ Bulu'luí'i lógaquië' Elías, en Moisés, tuí'ilenë' Jesús didza'.

⁵ Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí nõzinë' bi na' rnnë', tu' tádxinë' bönni' usëda queë' Jesús na'.

⁷ Ní'irö gurö'ö böaj le gulú'u zzul-la légaquië', ate' biyön chi'i nu ruí'i didza' lu böaj na', rna:

—Bönni' ni Zxí'ina'. Nadxí'ida' Lë'. Buli'zë nágali' Lë'.

⁸ La' bulu'yutë' pero cúnturö nu ta'lé'enë'. Tuzë Jesús zóalenë' légaquië'.

⁹ Tsanni ni' yú'ugaquië' nõza, tu'dínnië' lu gu'a sibi na', Jesús gunná bé'enë' légaquië' cuntu nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi.

¹⁰ Que lë ni na' gula'gú'usë' ícjagaquië' didza' ni bë'ë, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bë'ë, gunné' ubanë' lu yöl-la' guti.

¹¹ Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías zí'alö ca guídë' Cristo?

¹² Bubi'ë didza' Jesús, rnnë':

—Le nácatë guídë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rna run bayudxi qui'i sáquë'ë Bönni' Guljë' Bönachi, ate' cá'asö ulu'cá'ana bönachi Lë'?

¹³ Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

*Jesús ruúnë'-bi' bi'i bönni' yu'u lëbi' bö' xihui'
(Mt. 17:14-21; Lc. 9:37-43)*

¹⁴ Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zícá'rë' bönni' usëda queë' Jesús, bila'lé'enë' nacuá' bönachi zían

ni', ate' bönni' yudo' tu'sedinë' ta'díl-lalenë' yugu' bönni' usëda queë' na' didza'.

¹⁵ Cate' bönachi zián na' bila'lé'e Jesús, bulu'bani, en carelö zá'gaca ga na' zë'ë, dijödxigaca Lë': "Pa-diux."

¹⁶ Ní'irö Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

¹⁷ Bubi'ë didza' tu bönni' nútsë'ë ladaj bönachi zián na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'.

¹⁸ Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'në' bönni' usëda quiu' ulu'béajë' bö' xihui' na', pero biti' gula'zéquí'në'.

¹⁹ Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá ilena' queëli'? Guli'diguá'-bi' quia' ni.

²⁰ Dujúa'agaquië'-bi' ga na' zoë' Jesús. Cate' bö' xihui' na' bilé'e Lë', la' buxízitë lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'.

²¹ Ní'irö Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ní' nácatëbi' bí'ido' ré'ebi' caní.

²² Zián luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

²³ Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

²⁴ La' bē'tē' zidzaj didza' xúzibi' bi'i na', rnnē':

—¡Réajlë'a! ¡Gúcalen neda' para tséajlë'ëra' Lë'!

²⁵ Cate' bilé'enē' Jesús zá'gaca bönachi zían, tu'quí Lë', buzenē' bach bö' xihui' na', rē' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bíti'rö tsu'u lëbi'.

²⁶ Gurödxí'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, guluí'i didza' bönachi zían ni', ta'nná:

—Chinátibi'.

²⁷ Ní'irö Jesús gudélë'ë ná'abi', en buchisë'-bi', ate' guzuíbi' bi'i na'.

²⁸ Ní'irö guyázië' Jesús tu yu'u, ate' la' léguasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

²⁹ Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

Jesús rigúxjö'ë leyúbölö ca sí' ilútië' Lë'

(Mt. 17:22-23; Lc. 9:43-45)

³⁰ Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' rë'ënë' Jesús nu inözi ga na' zoë'

³¹ tu' rusëdinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

32 Biti' gula'yéajni'inë' didza' ni rë' légaquië', ate' tu' tádxinë', biti' bi gula'nábinë' Lë'.

Nu naca lo

(Mt. 18:1-5; Lc. 9:46-48)

33 Ní'irö Jesús, en bönni' dá'gaquië' Lë' bila'dxinë' yödzö Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

34 Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo.

35 Ní'irö gurö'ë Jesús, en bulidzë' idxínnutë' bönni' usëda queë'. Rë' légaquië':

—Nu rë'ëni gaca lo ral-la' gaca ca tu bönni' cuídí'sö, enca' ca ni'a ná'ali' yúgu'tëli'.

36 Ní'irö Jesús gudélë'ë-bi' tubi' bí'ido', en buzóë'-bi' gatsaj láhui'lö ga na' nacu'ë. Ni' runidë'-bi', rë' légaquië':

37 —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga neda'sö si' lu në'ë, pero si' lu në'ë ca' Xuza', Bönni' na' nasöl-lë'ë neda'.

Nu biti' ridá'baga' rë'u, rácalen rë'u

(Mt. 10:42; Lc. 9:49-50)

38 Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu'bö' xihui', rugunë' dxin lo'. Gunná bé'etu' lë' bíti'rö gunë' ca', tu' cabí dë'ë rë'u.

39 Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë'

dxin La' neda', biti' ca' gaca bönni' na' inně zi'ě quia'.

⁴⁰ Caní naca, nu biti' ridá'baga' rě'u, rácalen nu na' rě'u.

⁴¹ Núti'těs nu gunna queěli' tu zxíga'do' nisa guíjali' tu' dá'ali' neda', Cristo, si'i caz nu na' le ralla' gata' que.

Zoa bönadxi queěru' gunru' ga nu gun dul-la'
(Mt. 18:6-9; Lc. 17:1-2)

⁴² Gunně' ca' Jesús:

—Núti'těs nu gun ga gunbi' dul-la' tubi' bí'ido' caní réajlě'ěbi' neda', gácarö dxi'a ugal-la' nu na' guichi riyětu yaga yeni, en tsöjchú'una cuini lu nísado'.

⁴³ Channö tu no'o gun ga gunu' dul-la', guchugu le. Dxi'arö gaca quiu' tsöjtsáziu' ga su' ibanu' zoa tuz no'o, calěga zoa chopa no'o, ate' tsöjtsáziu' lu guí' gabila, ga ni' biti' ulu guí' que.

⁴⁴ Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

⁴⁵ Lěsca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáziu' ga su' ibanu' zoa tuz ni'u, calěga zoa chopa ni'u, ate' tsöjtsáziu' lu guí' gabila, ga ni' biti' ulu guí' que.

⁴⁶ Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

⁴⁷ Lěsca' caní, channö tu guiöj lo' gun ga gunu' dul-la', guléaj le. Gácarö dxi'a quiu' tsöjtsáziu' ga rinná bě'ě Dios zoa tuz guiöj lo', calěga zoa chopa guiöj lo', ate' tsöjtsáziu' lu guí' gabila.

⁴⁸ Lataj ni' biti' ilátiba' buzuga' yú'ugacaba' nupa tsöjcuá' ni', ate' guí' na' biti' ca' ulu.

49 'Ruxi'iru' bëla' zödi', en rugála'ru' le ra' guí, para cabí gaca ditaj. Lë ni rusedi rë'u ca ulu'huóaca dxi'a yúgu'të bönachi. Lësca' caní, ré'ënë' Dios izxí'i zödi' yúgu'të böa' bëdxido' tu'zégui'gaquië'-ba' lu bucugu lá'ayi queë'.

50 Dxi'a naca zödi', pero channö initi yöl-la' siná'a que, ¿nacxi úniru' le siná'a? Guli'gaca la' libí'isili' ca zödi' dxi'a, sóali' dxí'ado' tuli' len ia'tuli'.

10

Rusédinë' Jesús que nu rulá' yöl-la' nutsaga na'
(Mt. 19:1-12; Lc. 16:18)

1 Buzë'ë Jesús yödzö Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busédinë' légaquië' ca run cazë'.

2 Ní'irö bila'dxinë' bönni' yudo' fariseo ga zoë' Jesús, ate' té'ënnë' ilunë' ga bi innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë' lataj bönni' nutsaga në'ë usané'-nu nigula queë'?

3 Bubi'ë didza' Jesús, rnnë':

—¿Bizxi gunná bé'enë' Moisés libí'ili'?

4 Gula'nnë':

—Moisés bë'ë lataj nu bönni' uzúajë' lu guichi le rnna rulá'alënë'-nu nigula queë' na', ate' ní'irö usané'-nu.

5 Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja ládxi'do'oli',

6 pero cate' gusí lo rata' yödzölió, Dios benë' légaquië' bönni', en nigula.

⁷ Gunné': "Que lë ni na' ucá'anë' bönni' xuz xinë'ë, en tsöjsóalenë'-nu nigula queë',

⁸ ate' chopë' ni ulu'huöáquië' ca tuz bönachi." Que lë ni na' bíti'rö nácagaquië' chopë' pero tuz chinácagaquië'.

⁹ Que lë ni na' ca', nu naca bönachi biti' ral-la' ulá'a nupa na' chinutságuië' Dios.

¹⁰ Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë.

¹¹ Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalenë'-nu zí'alö.

¹² Lësca' caní channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuë'ë-bi' yugu' bí'ido'
(Mt. 19:13-15; Lc. 18:15-17)

¹³ Ní'irö bila'dxín bönachi ga zoë' Jesús du-juá'gaquië' bí'ido' quéguequi. Të'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la' dídza'gaquië' nupa na' dujuá'agaca légacabi'.

¹⁴ Cate' bilé'enë' Jesús lë ni, gulénë' légaquië', en gunné':

—Guli'güi'-gácabi' bí'ido' lataj ila'dxinbi' quia'. Biti' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bë'ë Dios.

15 Le nácatë rea' libí'ili': Nu cabí si' lu nē'e le rinná bē'ë Dios ca runbi' tu bí'ido', biti' ca' tsaza ga ni' rinná bē'ë.

16 Ní'irö Jesús bunidë'-bi' yugu' bí'ido' na'. Guxóa nē'ë lé'gacabi', en bulidza tsáhuë'ë-bi'.

Bönni' cuidi' napë' yöl-la' tsahui'

(Mt. 19:16-30; Lc. 18:18-30)

17 Cate' bu'ë Jesús nöza, carelö bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

18 Jesús gudxë' lë':

—¿Bizx que ru'u neda' didza', rno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a.

19 Chinóz quézinu' yugu' le gunná bē'ë Dios, gunnë':

Biti' gunu' dul-la' le riguitsaj xibá que yöl-la' nut-saga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

20 Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni nácatea' bí'ido'.

21 Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzej quégaca bönachi yechi' lë na' si'u, ate' gata' quiu' yöl-la' tsahui' yehua' yubá.

Ní'irö huödu' quia', gacu' ca tu bönni' sa'yéajë söjtë'ë lë'e yaga cruz, ate' to'o neda'.

²² Cate' biyönnë' didza' ni, buí'innë', ate' söhuöjë risëbi ládxi'ë tu' dëda' yöl-la' tsahui' queë'.

²³ Ní'irö buyüë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lë'e yöl-la' tsahui' ga rinná bë'ë Dios.

²⁴ Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', xzí'ina'do', böniga naca ila'yázië' bönni' tu'zxöni ládxi'gaquië' yöl-la' tsahui' quégaquië' ga rinná bë'ë Dios.

²⁵ Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tödiba' böa' ta'bía-ba' bönachi lu nagui yötsi'.

²⁶ Cate' bila'yönnë' didza' ni, bulu'bánnitëronë' ca'. Ta'nnë' la' légacasë':

—¿Nuzxi' caz gaca ulá, channö?

²⁷ Buyüë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

²⁸ Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

²⁹ Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzí'inë', o xiyüë', tu' runë' xichina' o tu' runë' libán que didza' dxi'a quia',

³⁰ bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzí'inë', en yugu' xiyüë', enca' yugu' le ila'bía ládxi'gaca

bönachi lë', ate' lu yödzölió si' za', gata' yöl-la' na'bán idú queë'.

³¹ Zián nupa nácgaca lo na'a, ilaca cuídí'sö ni', ate' nupa nácgaca cuídí'sö na'a, ilaca lo ni'.

Leyúbölö riguúxjö'ë Jesús ca si' ilútië' Lë'
(Mt. 20:17-19; Lc. 18:31-34)

³² Cate' ni' yú'ugaquië' nöza, ta'benë' söjáquië' Jerusalén, nanöruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyúbölö Jesús guchë'ë quez idxínnutë' na'. Gusí lahuë' ru'ilenë' légaquië' didza' ca naca le ral-la' gaca queë'.

³³ Rnnë':

—Rilé'e quezili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, ate' chúguië' quia' gátia', en ulu'dödë' neda' lu ná'agaquië' bönni' zi'tu'.

³⁴ Bönni' na' ulu'titjë' neda', en ilúndë'ë neda' zi'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië'
(Mt. 20:20-28)

³⁵ Ní'irö gula'biguë'ë Jacobo, en Juan, zxí'inë' Zebedeo, lahuë' Jesús, en të' Lë':

—Bönni' Usedi, ré'ënitú' gunu' queëtu' le inábatu'.

³⁶ Jesús gudxë' légaquië':

—¿Bizxi ré'ënili' guna' queëli'?

³⁷ Gulë' Lë':

—Cate' idxín dza cö'u ga inná bë'u, ben ga cö'ötu' tutu' cuitu' ibëla, en ia'tutu' cuitu' yögöla.

³⁸ Ní'irö Jesús gudxë' légaquië':

—Biti' nōzili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

³⁹ Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa,

⁴⁰ pero biti' dë lu na'a cōa' nu cuía cuita' ibëla, en nu cuía cuita' yōgōla. Dios unōdzjë' quégaquië' bönni' chinupë'ë quégaquië' yugu' lataj na'.

⁴¹ Cate' bila'yōnnë' ia'chíë' bönni' usëda queë' Jesús didza' ni, gula'lenë' Jacobo, en Juan na'.

⁴² Ní'irō Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yōdzō, tu'zenë' bach bōnachi, ate' nupa nácgaca lo lādjagaquië' ta'nná be'e luzë'eguequi.

⁴³ Biti' gaca caní queéli', pero nu guë'ëni gaca zxön ga zóali', ral-la' gun xichinli' ia'zíca rōli',

⁴⁴ ate' nútí'tëslōli' nu guë'ëni gaca lo ral-la' gaca ca bönni' huen dxin tsaz queéli' yúgu'tëli'.

⁴⁵ Caní ral-la' gunli' tu' bida' ni neda', Bönni' Guljë' Bōnachi, calëga para nu gun xichina', pero para guna' xichíngaca bōnachi, en udōda' yōl-la' na'bán quia' le huóá'uida' bōnachi zían.

Jesús ruúnë' Bartimeo, bönni' lo chul-la

(Mt. 20:29-34; Lc. 18:35-43)

⁴⁶ Ní'irō bila'dxinë' Jesús, en yugu' bönni' dá'gaquië' Lë' yōdzō Jericó. Cate' ni' rurujë' Jesús yōdzō ni, dzágagaquië' Lë' yugu' bönni' usëda queë', enca' bōnachi zían. Ra' nōza ni' rō'ë tu bönni' nachul-la lahuë', lë' Bartimeo, zxí'inë' Timeo. Rinabë' nu bi gúnнасö queë'.

47 Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¡Jesús, zxí'ini xi'sóë' David! ¡Buéchi' ladxi' neda'!

48 Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zídzejrö bulidzë', rnnë':

—¡Zxí'ini xi'sóë' David! ¡Buéchi' ladxi' neda'!

49 Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa ládxu'u! ¡Guyaschi! ¡Rulidzë' li'!

50 Ní'irö gurú'unë' tsölá'alö lari' naxóa yené'. La' guyásatë', en bidë' ga na' zoë' Jesús.

51 Jesús gunábinë' lë', rnnë':

—¿Bizxi ré'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, ré'ënda' gunu' ga huóálaj guiöj lahua'.

52 Jesús gudxë' lë':

—Böaj lidxu'. Chinuhuóácu' tu' réajlë'u neda'.

La' böáljatë guiöj lahuë', ate' sa'yéajlenë' Jesús.

11

Riyazië' Jesús yödzo Jerusalén

(Mt. 21:1-11; Lc. 19:28-40; Jn. 12:12-19)

¹ Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacua' yödzo Betfagé, en yödzo Betania, en ga na' dë ca' Guí'a Yaga Olivo. Ní'irö Jesús gusól-lë'ë chopë' bönni' usëda queë',

² en rë' légaquië':

—Guli'tsəaj lu yödžödo' dē loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntú nu ribíani lēba'. Guli'sedxi-ba', en guli'chě'-ba' quia' ni.

³ Channö nu bi guié libí'ili' tu' runli' lē ni, guli'guié nu na': "Xanru' riquinně'-ba', ate' la' usöl-la'tē'-ba' quiu'."

⁴ Ní'irö yöjáquiē', en yöjxáca'gaquiē'-ba' búrrodo' na', nága'ba' ra' nöza ga nu riyaza lö'a, ate' gula'sedxě'-ba'.

⁵ Nupa nacuá' ni' tē légaquiē':

—¿Bizxi ni runli'? ¿Bizx que risédxili'-ba' búrrodo' na'?

⁶ Bulu'bi'ē didza' bönni' usēda queē' Jesús, gulē légaquiē' ca na' chigudxi cazē' Jesús légaquiē', ate' gulu'ē légaquiē' lataj.

⁷ Ní'irö gula'chě'ē'-ba' búrrodo' na' ga na' zoē' Jesús. Gula'xóé' lari' quégaquiē' cúdzu'ba', ate' Jesús gudxiē'-ba'.

⁸ Zián bönni' nacu'ē ni' gula'chiljē' lari' quégaquiē' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

⁹ Gula'sí lo nupa nanörugaca lahuē' Jesús, en nupa na' zá'gaca cúdzu'lē' tuí'i zidzaj didza', ta'nně':

—¡Yöl-la' ba! ¡Xanru' Dios gun lá'ayē' Bönni' zē'ē ni, nasöl-lē'ē Dios Lē'!

¹⁰ ¡Dios gun lá'ayē' Bönni' ni si' inná bē'ē, ca na' gunná bē'ē xuz xtó'oru' David! ¡Yöl-la' ba Dios!

¹¹ Caní guca, bidxinē' Jesús Jerusalén, ate' guyáziē' lö'a yudo'. Cate' budxi buyúē' yúgu'tē le nacuá' idú gásibi'ilö ni', burúajē' zaca' yödžö

Betania tu' chiridzö', ate' dzágagaquië' Lë' yugu' bönni' usëda queë'.

Jesús rulidza zi'ë tu yaga higo

(Mt. 21:18-19)

¹² Cate' za' rení' ia'tú dza, ate' tu'rúajë' Jesús, en yugu' bönni' dá'gaquië' Lë' yödzö Betania, ridunë' Jesús.

¹³ Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' biti' bi yöjxaquië' le ribía. Xilágui'sö dxía tu' cabí ridxini dza cuía.

¹⁴ Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

Jesús rulatjë' lö'a yudo'

(Mt. 21:12-17; Lc. 19:45-48; Jn. 2:13-22)

¹⁵ Cate' bila'dxinë' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bö' nupa tuti' yugu' gu'dödo'.

¹⁶ Biti' ca' bë'ë lataj nu bi guá', uzóa nöza ga naca lö'a yudo'.

¹⁷ Busëdinë' nupa nacuá' ni', rnnë':

—Nazúaj lu guichi lá'ayi, rnna: “Lidxa' si'i le, yu'u ga bönachi idútë yödzölió ulu'lidza Dios.” Libí'ili' chinunli' le ca naca lídxigaca gubán.

¹⁸ Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilútië' Jesús, pero tu' tádxinë' le ilún

bönachi, biti' bi gulunë' queë', tu' tu'bani yúgu'të
bönachi ca naca le rusëdinë' Jesús.

¹⁹ Cate' chiridzö' burúajë' Jesús lu yödzo na'.

Ribidxi yaga higo bulidza zi'ë Jesús

(Mt. 21:20-22)

²⁰ Cate' za' rení' ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí.

²¹ Ní'irö yöjnenë' Pedro bi guca, ate' gudxë' Jesús:
—Bönni' Usedi, buyútsöca'. Chinabidxi yaga higo ni bulidza zi'u néaje.

²² Bubi'ë didza' Jesús, rë' légaquië':

—Guli'tseajlë' Dios.

²³ Le nácatë rea' libí'ili', channö nu bönni' guíë' gu'ado' ni: “Gucuíta ni, yöjsóa lu nísado”, en biti' gaca chopa ládxë'ë bönni' na', pero idú ládxë'ë tseajlë'ë gunë' Dios ca na' rnnë', ca' gaca.

²⁴ Que lë ni na' rea' libí'ili': Yúgu'të le inábali' cate' ulídzali'-në' Dios, guli'tséajlë' chibennë' Dios queëli' lë na' rinábali', ate' gunnë' queëli'.

²⁵ Cate' ni' rulídzali'-në' Dios, channö zoa nu rileli' nu bi ben queëli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'.

²⁶ Channö cabí uniti loli' bönachi, biti' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bë' dë lu në'ë Jesús

(Mt. 21:23-27; Lc. 20:1-8)

²⁷ Ní'irö Jesús, en yugu' bönni' dá'gaquië' Lë' yöjhuöjgaquië' Jerusalén. Cate' ni' ridë' Jesús ga

naca chila yudo', bila'dxinë' yugu' bixúz unná bē', en yugu' bönni' yudo' usedi, en bönni' gula tu'zėjni'inë', ga zoë'.

²⁸ Gula'nábinë' Jesús, ta'nnë':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budödi lu no'o yöl-la' unná bē' gunu' caní?

²⁹ Bubi'ë didza' Jesús, rē' légaquië':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bē' rúnida' yugu' lē ni.

³⁰ ¿Nuzxi budödi lu në'ë Juan uquilë' bönachi nisa? ¿Naru' Dios o bönachi? Guli'nnátsöca'.

³¹ Gula'sí lógaquië' tun xtídza'gaquië' la' légacasë', ta'nnë':

—Channö innaru' Dios gusöl-lë'ë lē', guíë' rē'u: “¿Bizx que biti' guyéajlë'ëli' lē'?”

³² ¿Naru' guíëtsaru'-në': Gula'söl-lë'ë bönni' lē'?

Caní ta'zá' ládxi'gaquië' tu' tádxinë' le ilún bönachi zían nacúa' ní' tu' téquiquequi yúgu'të bönachi na' bë'ë didza' Juan na' uláz queë' Dios.

³³ Que lē ni na' gulë' Jesús:

—Biti' nöztu'.

Ní'irö Jesús gudxë' légaquië':

—Neda' ca' biti' quíxjöi'ida' libí'ili' bi yöl-la' unná bē' dē lu na'a rúnida' yugu' lē ni.

12

Rucúdzu'ë didza' Jesús ca gaca quégaca huen dxin biti' nácagaca tsahui'

(Mt. 21:33-46; Lc. 20:9-19)

1 Ní'irö gusí lahuë' Jesús ru'ilenë' yugu' bönni' dá'gaquië' Lë' didza' yugu' le rucúdzu'ë didza', rnnë':

—Guzóë' tu bönni', budë'ë lubá uva zían ga naca lu xiyúë'. Guléquië' lë'a que, en guchó'önë' tu röga' guiöj ga isié' xisi uva na'. Budxíë' tu yu'u gupa ga naca xitsá' ga nu uyú xiyúë' na'.

'Ní'irö budödë' xiyúë' na' lu ná'agaquië' huen dxin, ila'zi'ë gatsaj huéaj le unödzej, ate' guyijë' yödzö zi'tu'.

2 Cate' bidxín dza ulu'chibë' le ribía, gusöl-lë'ë-bi' bi'i huen dxin tsöjxí'ibi' lu ná'agaquië' huen dxin na' le ral-la' si'ë xanbi' que le gula'bía lubá uva na'.

3 Ní'irö yugu' huen dxin na' gula'guélë'ë-bi' bi'i na', en gulundë'-bi' zi', ate' bulu'söl-lë'ë-bi' cá'asöbi'.

4 Ní'irö bönni' xan luyú na' gusöl-lë'ë-bi' ia'tubi' bi'i huen dxin queë', ate' bi'i ni bulu'ladxë'-bi' guiöj. Bulu'lë'ë' ícjabi'. Gulu'ë dö' queëbi'.

5 Ní'irö bönni' xan luyú na' gusöl-lë'ë-bi' ca' ia'tubi' bi'i huen dxin queë', ate' bi'i ni gulútië'-bi'. Gusöl-lë'ë-bi' ca' zíanröbi', ate' bál-labi' gulúngacadë'-bi' zi', en ia'bál-labi' gulútigaquië'-bi'.

6 'Cúnturö nu nagá'ana queë' xan luyú na'. Nagá'anasibi' zxí'inë', ate' nadxí'ide'enë'-bi'. Ga yöjsetë, gusöl-lë'ë-bi' zxí'inë', rnnë': "Ilunë' bal zxí'ina'."

7 Ní'irö yugu' bönni' huen dxin na' gula'nnë' la' légacasë', ta'nnë': "Bi'i ni ral-la' guequi queëbi' luyú ni. Guli'dá, gútiru'-bi', ate' guequi queëru' luyú ni."

8 Que lë ni na' gula'zönë'-bi', en gulútië'-bi'. Gula'ru'unë'-bi' ní'ilö ga dá'gaca lubá uva na'.

9 Ní'irö Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channö? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölö.

10 '¿Naru' cabí nulábanili' lë na' nazúaj lu guichi lá'ayi? Caní rnna:

Guiöj na' gula'rú'unë' bönni' tu'cu'ë zö'ö, na'a naca guiöj len, squin zö'ö.

11 Xanru' Dios benë' ga naca caní ate' rubániru' ca naca lë ni rilé'eru'.

12 Ní'irö ta'zóa ta'bö'ë ila'zönë' Jesús tu' téquibe'enë' bucúdzu'ë didza' ca naca quégaquië', pero tádxinë' le ilún bönachi zían nacuá' ni', en que lë ni na' bulu'cá'anë' Lë', söhuöjgaquië'.

*Ca naca le ta'guíxaj lázagaca bönachi
(Mt. 22:15-22; Lc. 20:20-26)*

13 Gudödi lë ni yugu' bönni' yudo' unná bë' na' gula'söl-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu' zéguië' Lë' didza'.

14 Bila'dxinë' bönni' ni ga na' zoë' Jesús, en të' Lë':

—Bönni' Usedi, nözitu' ru'u didza' idütë li. Biti' ruí'i ládxi'u bi ta'nnasö bönachi, tu' cabí ruyusu' le tu'lu'isö cúnguequi bönachi, pero rusëdinu' ca nácatë le rë'ënë' Dios ilún bönachi. ¿Ruí'i netu' lataj xibá queë' Moisés quíxaj laztu' le tu'quíxjë' uláz queë' César? ¿Naru' uguíxajtu' o bití' quíxajtu'?

15 Réquibe'enë' Jesús tu'ë didza' lu yöl-la' riguílaj ladxi' quégaquië', ate' rë' légaquië':

—¿Bixx que rubéajli' neda' didza'? Gulí'diguá'tsóca' tu dumí ridá para ilé'eda' le.

16 Diguá'agaquië' le, ate' Jesús gunábinë légaquië', rnnë':

—¿Nuzxi lahui da' lë'e ni, en nuzxi lë ni?

Bulu'bi'ë didza', ta'nnë':

—Queë' César na'.

17 Ní'irö Jesús gudxë' légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'báninë' ca naca didza' bubí'ë Jesús.

Ca naca que yöl-la' rubán lu yöl-la' guti
(Mt. 22:23-33; Lc. 20:27-40)

18 Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' bití' ulu'bán nupa chinátigaca. Que lë ni na' gulë' Jesús, ta'nnë':

19 —Bönni' Usedi, Moisés nuzúajë' queëru' lu guichi channö gátië' tu bönni' bití' zoa bí'i queë', ate' ugá'ananu nigula queë', bí'i böchë'ë bönni' na' ral-la' utsaga ná'alénbi'-nu, en uzóabi' bí'ido' gácabi' bí'i queëbi' böchi'bi'.

20 Gula'cuá'abi' gádxibi' bí'i nácacacabi' böchi'gacabi'. Bí'i huáca na' butsaga ná'alénbi'-nu nigula, ate' gútibi', cuntú nu zoa bí'ido' queëbi'.

21 Bí'i buropi na' butsaga ná'alénbi'-nu nigula uzëbi na', ate' gútibi' ca', cuntú nu zoa bí'ido' queëbi'. Lëscá caní guca queëbi' bí'i bunny.

22 Caní guca, bulu'tsaga ná'alénbi'-nu yúgu'tëbi', cuntú nu zoa bí'ido' quégacabi'. Ga yöjsetë, gútinu ca' nigula na'.

23 Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alénbi'-nu igádxitëbi'?

24 Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en biti' nózili' ca naca yöl-la' huáca queë' Dios.

²⁵ Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nácagaquië' gubáz lá'ayi queë' Dios, nacu'ë yehua' yubá.

²⁶ Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Ruí'i didza' ca na' bulidzë' Dios lë' lu yaga yótsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunné' caní quégaquië', naca bë' nabángaqië' sal-la' gulátië' zí'alö.

²⁷ Dios náquië' Dios quégaca nupa nabángaca, calëga quégaca nupa nátigaca tsaz. Richíxitëröli'.

Le naca lo le gunná bë'ë Dios

(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' gulu'ilenë' Jesús didza', en nözinë' dxí'ado' bubí'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácaterö lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácaterö lo ca yúgu'të naca lë na' rna: "Guli'yöni bönachi Israel. Xanru' Dios, tuzë' Lë' náquië' Xanru'.

³⁰ Ral-la' idxí'ínu' Xanu' Dios idú ládxi'u, en lu idú icja ládxi'do'o, en lu idú yöl-la' réajni'i quiu', en lu idú yöl-la' huáca quiu'." Lë ni naca le gunná bë'ë le nácaterö lo.

31 Le gunná bè'ë le naca buropi, lëbisö ca naca. Caní rna: “Ral-la' idxí'inu' luzó'o ca nadxí'i cuinu'.” Biti' ca' zoa ia'tú le gunná bè'ë le nácarö lo ca chopa ni gunná bè'ë.

32 Ní'irö bönni' yudo' usedi na' gudxë' Jesús, rnnë':

—Dxi'ado' gunnó', Bönni' Usedi. Le nácatë rnno'. Tuzë' náquië' Dios, en cúnturö nu zoa naca Dios.

33 Para idxí'iru'-në' Dios idú ládxi'ru', en lu idú yöl-la' réajni'i queëru', en lu idú icja ládxi'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácarö lesaca' ca yúgu'të böa' bëdxido' rútigacaru'-ba' lu bucugu lá'ayi queë' Dios, enca' ca yúgu'të böa' bëdxido' ruzégui'gacaru'-ba' lu bucugu na'.

34 Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'láti'sö riyadzaj quiu' gúnbë'u le rinná bë'ë Dios.

Cúnturö nu burugui bi inábini Jesús.

¿Nuzxi zxi'ini náquië' Cristo?

(Mt. 22:41-46; Lc. 20:41-44)

35 Cate' ni' rusëdinë' Jesús bönachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo zxi'ini xi'sóë' David?

36 Lë' cazë' David na' bë'ë didza', zóalenë' Dios Bö Lá'ayi lë', gunné':

Xanru' Dios gudxë' Xana':

“Gurö'ö cuita lë'a ibëla cate' gunra' ga ulu'zóa zxi'bigaca lo' nupa bití' ta'lé'e Li' dxi'a.”

37 ¿Naru' nácatsë' Cristo zxi'ini xi'sóë' David channö lë cazë' David na' rnnë' queë' náquië' Xanë'?

Bönachi zían nacuá' ni' tu'zë' nágagaca Lë' gula'yaza ládxi'gaca didza' ni.

*Jesús ruzéqui'ë didza' bönni' yudo' tu'sëdinë'
(Mt. 23:1-36; Lc. 11:37-54; 20:45-47)*

38 Ni' rusëdinë' Jesús yugu' bönni' dá'gaquië' Lë', rë' légaquië':

—Guli'gún chi'i cuinli' quégaquië' bönni' yudo' tu'sëdinë'. Ta'yaza ládxi'gaquië' ta'dé' nilö na'lö, nácugaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yë'ëyi.

39 Ta'bö'ë yugu' lataj lo lu yu'u ga tu'dubë' tu'sëdë' queë' Dios, enca' gapa tu'dubë' të'aj tahuë'.

40 Rugúagaquië' lídxigacanu nigula uzëbi, en para ulu'lu'isö tsahui' cuíngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

*Le bunödzjanu tu nigula uzëbido' queë' Dios
(Lc. 21:1-4)*

41 Tsanni ni' rö'ë Jesús chila yudo' ga zoa gu'ina ga ta'gú'u bönachi dumí que yudó', ruyúë' ca tun bönachi ta'gú'u dumí lu gu'ina. Dumí zían ta'gu'ë bönni' dë yöl-la' tsahui' quégaquië'.

42 Ní'irö bidxinnu tu nigula yechi' uzëbido' ni', ate' gulú'unu chopa dumí lásido', le nazáca'gaca láti'do'os.

43 Ní'irö bulidzë' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzëbido' ni gulú'urönu ca yúgu'të nupa bi ta'gú'u lu guí'ina que yudo'.

⁴⁴ Yúgu'të bönni' ni ta'gu'ë que le nagá'anasö quëgaquië', pero nigula ni, lu yöl-la' yéchi'do' queënu gulú'unu idútë la's dui tsca le dësö queënu, le ral-la' gáhuinu.

13

Rigúxjö'ë Jesús ca si' ulu'quínnajë' yudo'
(Mt. 24:1-2; Lc. 21:5-6)

¹ Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö quëguequi.

² Bubi'ë didza' Jesús, rë' lë':

—Rilé'enu' yugu' yu'u zxön ni, pero biti' ca' ugá'ana guiöj lahui luzë'e ni, tu' ulu'quínnaj bönnachi léguequi.

Le ilaca bë' cate' si' údxi que yödzölió
(Mt. 24:3-28; Lc. 21:7-24; 17:22-24)

³ Ní'irö yöjáquië' Jesús, en yugu' bönni' dá'gaquië' Lë' lu Guí'a Yaga Olivo, guí'a na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

⁴ —Gudíxjö'i netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

⁵ Bubi'ë didza' Jesús, rusëdinë' légaquië', rnnë':

—Guli'gún chi'i cuinli' para cabí nu si' ye'e libí'ili'.

6 Ila'lá' lahuë' zián bönni' si' lágaquië' ca lea' neda', ila'nnë' nácagaquië' Cristo. Caní ila'zí' yé'enë' bönachi zián.

7 Ní'irö cate' yónili' raca gudil-la nilö ná'alö, biti' gádxili'. Yúgu'të læ ni ral-la' ilaca, pero biti' ridxini dza údxi.

8 Tu yödzö tíl-lalen ia'tú yödzö, en tu ga nu rinná bë' tsöjtíl-lalen ia'tú ga nu rinná bë'. Zián lataj tödi budó' zxu', en tsu'u gubín. Ila'tsatsa bönachi. Yugu' læ ni ilaca le isí lo ila'guí'i ila'zaca' bönachi dza ni'.

9 Ní'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödzö zi'tu'. Ilunë' caní queëli' tu' dá'ali' neda', pero gunli' ba nalí quia' neda' ni'.

10 Zí'alö ca idxín dza údxi, run bayudxi gaca libán que didza' dxi'a quia' lógaca bönachi idútë yödzölió.

11 Cate' ni' ila'ché'ë libí'ili', en ulu'dödë' libí'ili' lu ná'agaquië' bönni' yúlahui', biti' gü'i ládxi'li' bizxi innali'. La' dza ní'isö Dios gunnë' queëli' didza' gü'ili', ate' læ ni innali'. Cate' ni' gü'ili' didza', calëga libí'isili' na' innali', pero Dios Bö' Lá'ayi innë'.

12 Ulu'dödi bönachi la' böchi'gacasö lu ná'agaquië' bönni' ilútië' légaquië'. Yugu' bönni' nacuá'abi' bi'i quégaquië' ulu'dödë' la' zxi'inigaca cazë' ca', ate' zxi'inigaquië' na' ulu'dödibi' la' xuz xiná'agaca cázabi' lu ná'agaquië' bönni' ilútië' légaquië'.

13 Yúgu'të bönachi ulu'zóa libí'ili' tsölá'alö tu'

dá'ali' neda', pero núlöli' guá' ilenli' lë na' ga idx-
inrö dza údxi, uláli'.

14 'Nupa tu'laba didza' ni ral-la' ila'yéajni'i.
Buzúajë' lu guichi Daniel, bönni' ni' bë'ë didza'
uláz queë' Dios, le rnna caní: "Tsaz tu le xihui'
le rucá'ana cané ga naca la'ayi." Dza ní'irö ral-
la' ila'zxunnaj nupa nacuá' luyú Judea, en tsöjaca
gapa naca lu guí'ado'.

15 Nu zoa ícjo'olö dza ni' ral-la' izxúnnajtë, en biti'
huötaj zxan yu'u para tsöjzxi' bi dë que lu yu'u.

16 Nu zoa la' guixi' ral-la' izxúnnajtë, en biti'
huöaj tsöjzxi' lari' rixóa yeni.

17 Bica' bayechi' yugu' nigula dza ni'
nuá'agacanu-bi' bí'ido', enca' nigula tu'gádxinu-
bi' bí'ido'.

18 Buli'lidzë' Dios inábili'-në' cabí gun bayudxi
izxúnnajli' cate' raca beo' ziaga ca'.

19 Yugu' dza ni' ila'guí'i ila'zaca'rö bönachi ca le
guca zí'atëlö cate' si' guta' yödzölió le benë' Dios ga
ridxintë na'a dza, ate' dza zá'gaca biti' gaca caní.

20 La'tu' cabí nunë' Dios ga ulu'huóáca nabábasö
yugu' dza ni', cuntu nu ulá, pero tu' nadxí'inë'
nupa chigurö cazë', chinunë' queë' gunë' ga
ulu'huóáca nabábasö yugu' dza ni'.

21 'Na'a, channö nu guíë libí'ili': "Buli'yútsöca', ni
zoë' Cristo", o inná: "Buli'yútsöca', ni' zoë'", biti' ca'
tséajlë'ëli' nu na'.

22 Ila'lá' lahuë' zían bönni' ila'zí' yé'enë' bönachi.
Ila'nnë' nácagaquië' Cristo, en ila'nnë' nácagaquië'
bönni' tu'ë didza' uláz queë' Dios. Ulu'luí'inë'
le ilaca bë', en ilunë' yugu' yöl-la' huáca zxön.
Huala'zí' yé'enë' ca' nupa gurö cazë' Dios channö
ila'zéqui'në'.

23 Ní'irö libí'ili', guli'sóa ban ladxi'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi
(Mt. 24:29-35, 42-44; Lc. 21:25-36)

24 Gunnë' ca' Jesús:

—Yugu' dza ni', tödi gaca dza na' ila'guí'i ila'zaca' caní bönachi, ichul-la gubidza, en bití' cu'u bení' beo'.

25 Ila'guínnaj böläj lúzxiba, en ila'zxizi le nál-lagaca nalá'gaca lúzxiba na'.

26 Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'.

27 Isöl-la'gaca'-në' gubáz lá'ayi quia', ate' ulu'tubë' bönachi guró caza' quia' nacuá' idapa la'a yödzölió, ga naguéla'të luyú bidxi, ga ridxintë ga naguela' lúzxiba.

28 'Guli'tséajni'i le rusedi yaga higo ni'. Cate' ta'lén ni'a në'e huë'énido', en rubía xilagui' yulu, nözili' chizóa idxín beo' cusubá.

29 Lësca' caní, cate' ilé'eli' taca lë ni, inözili' chizóa idxín dza údxi na', en chiridzaga lo.

30 Le nácatë rea' libí'ili', yúgu'të lë ni ilaca zí'atëlö ca ilátigaca nupa nacuá' dza na'.

31 Huadödi que lúzxiba, en que luyú ni, pero xtídza'a catu caz tödi que.

32 'Cate' idxín dza ni' o rëla ni', cuntu nu nözi. Bití' nözguequinë' gubáz lá'ayi nacu'ë yehua' yubá, en bití' nözda' neda', Zxí'inë' Dios. Tuzë' Dios Xuz nözinë'.

33 Que lë ni na', buli'subán ládxi'li'. Guli'sóa sina', en buli'lidzë' Dios tu' cabí nözili' bizxi dza gaca lë ni.

³⁴ Gaca ca raca cate' sa'yéajë' zi'tu' tu bönni'. Cate' chizóa uzë'ë lidxë', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaquië', en inná bë'ë soa ban ladxi' nu zoa huen chi'i ga nu riyaza.

³⁵ Guli'sóa libí'ili' ban ladxi' tu' cabí nözili' bátaxi huödë' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'.

³⁶ Guli'gún caní, para cabí idixáquië' libí'ili' rásili' channö huödë' tsárido'os.

³⁷ Lë ni rea' libí'ili', rea' ca' yúgu'të bönachi: Guli'sóa ban ladxi'.

14

Tun xtídzagaquië' bönni' yudo' ila'zönë' Jesús (Mt. 26:1-5; Lc. 22:1-2; Jn. 11:45-53)

¹ Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yöta xtila bití' nazí' cúa zi que. Ta'zóa ta'bö'ë yugu' bixúz unná bë', en bönni' yudo' tu'sëdinë' ila'zönë' Jesús bagáchi'sö para ilútië' Lë'.

² Ta'nnë':

—Bití' gaca sönru'-në' dza laní tu' ila'tsatsa bönachi.

Nigula rigú'unu le rilá' zxixi icjë' Jesús (Mt. 26:6-13; Jn. 12:1-8)

³ Zoë' Jesús yödzo Betania, lu yu'u lidxë' Simón, bönni' güí'inë' huë' nudzu' ruzödi. Tsanni ni rö'ë rahuë' Jesús, guyázanu tu nigula, nuá'anu tu böga'do' néquini guiöj zaca', yudzu le rilá' zxixi que yöj susén lasi idú, le nazaca' yenni'. Gulá'anu

bõga'do' na', en gulú'unu le rilá' zxixi na' icjë' Jesús.

⁴ Gula'lélanë' bal-lë' bönni' nacu'ë ni'. Ta'nnë' la' légacasë':

—¿Bizx que guca ditaj le zxixi na'?

⁵ La'tu' nu guti' lë na', huazí' que ia'lati' ca lázxjaru' que tu iz para nu quisi le quégaca bönachi yechi'.

Gula'nnëdë'ë queënu.

⁶ Ní'irö Jesús bë'ë didza', rnnë':

—Guli'gü'i-nu lataj. ¿Bizx que rinnë zí'ili' queënu? Naca dxi'a le bennu quia'.

⁷ Nacuá'lentica'sö bönachi yechi' libí'ili', en bátati'tës guë'enili', huáca gunlí' dxi'a quégaquië', pero neda' biti' sóatica'sa' ga zóali'.

⁸ Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlö ca igácha'a yeru ba.

⁹ Le nácatë rea' libí'ili', gáti'tës ga gaca libán que didza' dxi'a quia' idú yödzölió, soa nu quixjò' ca' lë ni bennu nigula ni quia'. Caní gaca para nu tsöjné lënu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

¹⁰ Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'.

¹¹ Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

Le rë'aj ráguru' rusubanru' ca gútië' Xanru'
 (Mt. 26:17-29; Lc. 22:7-23; Jn. 13:21-30; 1Co.
 11:23-26)

12 Naca dza risí lo laní cate' tahuë' yöta xtila biti' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu' tséajtu' tsöjpa'atu' le gáguru' xtsö' que Laní Pascua?

13 Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzö. Ni' huadzágali' tu bönni' nu'ë tu rö'ö nisa. Guli'tséajlenë'.

14 Ga na' tsázië', guli'guié' xan yu'u na': “Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?”

15 Ní'irö uluí'inë' libí'ili' tu yu'u zxön ga naca buropi cuía ga chinabá'a. Buli'pá'a le gáguru' ni'.

16 Bila'rúajë' bönni' usëda queë' na', en bila'dxinë' lu yödzö, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

17 Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'.

18 Tsanni ni' rö'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulën neda' tsözxön, nu udödi neda' lu ná'agaca bönachi.

19 Ní'irö bulu'huí'innë', en gula'sílógaquië' tu tuë' të' Lë':

—¿Naru' neda'?

Ia'túë' ca' gunnë':

—¿Naru' neda'?

²⁰ Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yö'öna.

²¹ Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

²² Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzxuzxjë' le, en bë'ë quégaquië', rnnë':

—Gulí'gagu. Lë ni naca bëla' rön quia'.

²³ Gudélë'ë ca' tu zxíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulë'ajë' le.

²⁴ Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zián.

²⁵ Le nácatë rea' libí'ili', bíti'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

Jesús rnnë' innë' Pedro biti' núnbë'ë Lë'

(Mt. 26:30-35; Lc. 22:31-34; Jn. 13:36-38)

²⁶ Gudödi gulúl-lë' yöl-la' ba, bila'rúajë' sójáquië' Guí'a Yaga Olivo.

²⁷ Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rnná: "Gutia'-në' uyú bö'cu' zxila', ate' ilásilasiba' bö'cu' zxila' na'."

28 Tödi ubana' lu yöl-la' guti, tseja' luyú Galilea zí'alö ca libí'ili'.

29 Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

30 Jesús gudxë' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti' núnbë'u neda'.

31 Ní'irö Pedro buzötjë' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemani

(Mt. 26:36-46; Lc. 22:39-46)

32 Ní'irö Jesús, en bönni' dá'gaquië' Lë' bila'dxinë' la' yëla Getsemani, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

33 Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxe'ë.

34 Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

35 Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'.

36 Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

37 Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'?

38 Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuídi'li'.

39 Ní'irö sa'yéajë' Jesús leyúbölö, rulidzë' Dios, en la' tuz ca gunnë'.

40 Cate' böajë' leyúbölö ga na' nacu'ë, yöjxáquië' légaquië' tasië' tu' nadödité yëla lógaquië'. Biti' nözguequinë' bizxi didza' ulu'bi'ë, le ilë' Lë'.

41 Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¡Tscá'ti' gaz!
¡Chibidxín dza! ¡Buli'yútsöca', Neda', Bönni' Guljë'
Bönachi, chinadóda' lu ná'agaca bönachi dul-la'!

42 ¡Guli'chasa, uyéajru'! ¡Buli'yútsöca', chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

43 Ni' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guié' tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasöl-la'gaquië' légaquië'.

44 Judas, bönni' na' rudödë' Jesús lu ná'agaquië' chinuluí'inë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús.
 ¡Guli'sönë', en guli'chë'è! ¡Guli'yútsöquië'!

⁴⁵ Cate' bidxinë' Judas ni', la' gubíga'të' ga na' zoë'
 Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús.

⁴⁶ Ní'irö gula'zönë' Jesús, en gula'chë'ë Lë'
 nadzunë'.

⁴⁷ Ní'irö tuë' bönni' ni' dë'ë Jesús guléajë' guié
 tuchi', en benë'-bi' huë' bi'i huen dxin queë' bixúz
 lo. Guchúguië' guídi nágabi'.

⁴⁸ Jesús gudxë' bönachi na', rnnë':

—¿Narúajtsali' nuá'ali' guié tuchi', en yaga para
 sönli' neda', runli' ca runli' cate' rizönli'-në' gubán?

⁴⁹ Yugu' dza guzóalena' libí'ili' rusédigacada'
 bönachi ga naca chila yudo', ate' biti' guzxönli'
 neda', pero raca caní para gaca le nazúaj lu guichi
 lá'ayi.

⁵⁰ Ní'irö yúgu'të bönni' usëda queë' Jesús
 bulu'cá'anë' Le', ta'zxnúnajë'.

Rixúnajbi' tubi' bi'i ra'bán

⁵¹ Zóabi' ca' ni' tubi' bi'i ra'bán söjnobí' Jesús,
 nuxóasö cuinbi' tu lari' blaga'. Yugu' bönni' na'
 nachë'gaquië' Jesús gula'zönë'-bi'

⁵² pero busanbi' lari' na', en xiguídisöbi'
 buzxúnajbi'.

Ridxinë' Jesús lógaquië' bönni' yúlalui' lo

(Mt. 26:57-68; Lc. 22:54-55, 63-71; Jn. 18:12-14,
 19-24)

⁵³ Gula'chë'ë Jesús lahuë' bixúz lo, ate'
 bulu'dubë' ni' yúgu'të bixúz unná bë', en bönni'
 gula tu'zéajni'inë', en yugu' bönni' yudo' usedi.

54 Pedro yöjnahuë Jesús zi'tu' zí'tu'sö, en guyázië lö'a lidxi bixúz lo na', en gurö'ölenë' tsözxön yugu' ni'a në'ë bixúz lo na', rutsë'e cuinë' ra' guí'.

55 Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca ila'chúguië' queë' gátië' pero biti' bi bulu'dzölinë'.

56 Bönni' zían gula'nnë' queë' Jesús le cabí nácatë, pero biti' yöjlözagaca le gula'nnë' queë'.

57 Ní'irö gula'zuinë' yugu' bönni' gula'nnë' queë' Jesús le cabí nácatë, ta'nnë':

58 —Netu' biyönitu' didza' bë'ë bönni' ni, gunné': “Uquínaja' yudo' ni, lë ni nequi lu ni'a lu na' bönachi, ate' tsonna dzasö uchisa' ia'tú le cabí nequi lu ni'a lu na' bönachi.”

59 Lësca' lë ni, biti' yöjlözagaca xtída'gaquië'.

60 Ní'irö guyasë' bixúz lo na' gatsaj láhui'lö bönachi nacuá' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

61 Jesús, dxisö zoë'. Biti' bi didza' rubi'ë. Gunábinë' Lë' leyúbölö bixúz lo na', rnnë':

—¿Naru' nacu' Li' Cristo, Zxí'inë' Dios Lá'ayi?

62 Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúzxiba.

63 Ní'irö bixúz lo na', lu yöl-la' rilé queë' guchözë' lari' nácuë', rnnë':

—¿Núzxirö naquíniru' nu quixjö'?

64 ¡Riyön quézili' rucá'anë' Dios cá'asö len didza' ru'ë! ¿Nacxi rusáca'li' queëli'?

Yúgu'të' gula'chúguië' queë' gátië'.

⁶⁵ Ní'irö gula'sí lógaquië' bal-lë' tu'chejë' Jesús zxöna'. Bulu'sayjë' lahuë', en gulundë' Lë' zi', ta'nnë':

—Gunnë yá'atsöca' nuzxi na' bë' Li'.

Yugu' bönni' ni'a në'ë bixúz lo gula'gápë'ë ru'ë Jesús.

Rnnë' Pedro biti' núnbë'ë Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Cate' ni' zoë' Pedro lö'a zxan yu'u, bidxinbi' tubi' bi'i nigula huen dxin queë' bixúz lo na' ga na' zoë'.

⁶⁷ Cate' bilé'ebi' Pedro, rö'ë rutsë'e cuinë' ra' guí', buyubi' lë', rnnabi':

—Do' o ca' li' Jesús, bönni' Nazaret na'.

⁶⁸ Gudá'baguië' Pedro, rnnë':

—Biti' núnbë'a-në', en biti' nözda' bizxi na' rnno'.

Burúajë' Pedro yöjsóë' ga nu riyaza lö'a. Ní'irö gurödxiba' böra.

⁶⁹ Buyubi' lë' leyúbölö bi'i nigula huen dxin na', en gusí lobi' rëbi' nupa nacuá' ni':

—Bönni' ni dzáguië' légaquië'.

⁷⁰ Leyúbölö gudá'baguië' Pedro. Ia'lati' gudzé nupa nacuá' ni' të Pedro, ta'nná:

—Le nácatë dzagu' légaquië', tu' nacu' bönni' Galilea. Yöl-la' ru'ísö quiu' didza' naca bë'u, tu' tuz ca ru'íli' didza'.

⁷¹ Gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' na' ru'íli' didza' ca naca queë'.

⁷² La' gurödxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxë' lë': “Zi'alö cödxiba' böra le buropi luzuí, tsonna luzuí

innó' biti' núnbë'u neda'." Cate' yöjnenë' didza' ni, gusí lahuë' ribödxidë'ë.

15

Ridxinë' Jesús lahuë' Pilato, bönni' rinná bë'ë
(Mt. 27:1-2, 11-14; Lc. 23:1-5; Jn. 18:28-38)

¹ Ni' naca zílado', yugu' bixúz unná bë' len bönni' gula tu'zéajni'inë', en yugu' bönni' yudo' usedi, en yúgu'të bönni' yúlahui' lo gulún xtídza'gaquië'. Ní'irö gula'chë'ë Jesús náguë'ë, en bulu'dödë' Lë' lu në'ë Pilato, bönni' rinná bë'ë uláz que yödz Roma.

² Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rno'.

³ Yugu' bixúz unná bë' bulu'zéguië' Jesús didza' le zían.

⁴ Ní'irö Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzëtsöca' nagu' cate' xö zían le ta'nnë' quiu'.

⁵ Biti' bi didza' bubi'ë Jesús. Ca' guca, bubábinë' Pilato.

Ta'chúguië' queë' Jesús gátië'
(Mt. 27:15-31; Lc. 23:13-25; Jn. 18:38-19:16)

⁶ Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guié, nútí'tës nu ta'naba.

⁷ Nadzunë' tu bönni' lë' Barrabás lidxi guié, ate' dzágagaquië' lë' ia'bal-lë' luzë'ë, yugu' bönni' gulútië' bönachi cate' gula'dá'báguië' yúlahui'.

⁸ Cate' bila'dxín bönachi zían ni', gula'sí lógaquië' ta'nabë' lahuë' Pilato gunë' quégaquië' ca run cazë'.

9 Bubi'ë didza' Pilato, rnnë':

—¿Rě'ënili' usana'-në' queëli' Bönni' Inná Bé'enë' Bönachi Judío?

10 Caní gunnë' Pilato tu' réquibe'enë' bulu'dödë' yugu' bixúz unná bë' Jesús lu nē'ë tu' tu'zxé'enë' Lë'.

11 Yugu' bixúz unná bë' na' gula'gu'ë xilá ládxi'gaca bönachi zían na', para ila'nabë' lahuë' Pilato usanë' lu ná'agaquië' Barrabás.

12 Ní'irö Pilato gunábinë' légaquië' leyúbölö, rnnë':

—¿Bizxi rě'ënili' guna' queë' bönni' na' ruí'ili' lë', Bönni' Inná Bé'enë' Bönachi Judío?

13 Gulu'ë zidzaj didza', ta'nnë':

—¡Budë'ë lë'e yaga cruz!

14 Gunábinë' Pilato légaquië', rnnë':

—¿Bizxi caz dö' nu'ë?

Leyúbölö tu'ë zidzaj didza', ta'nnë':

—¡Budë'ë lë'e yaga cruz!

15 Tu' gú'unnë' Pilato gunë' ga ila'yaza ládxi'gaca bönachi zían na', busanë' Barrabás lu ná'agaquië'. Ní'irö gunná bé'enë' nu quin Jesús, ate' budödë' Lë' lu ná'agaquië' bönni' ulu'dë'ë Lë' lë'e yaga cruz.

16 Ní'irö yugu' bönni' röjáquië' gudil-la gula'chë'ë Jesús lö'a yúlahui', ate' bulu'tubë' luzá'agaquië' ni'.

17 Bulu'gácuë' Jesús tu lari' xiná gul-la, en gulunë' tu bregui' ni'a nē'e yötsi', le bulu'dxië' icjë'.

18 Ní'irö gula'sí lógaquië' tu'lidzë' Jesús, ta'nnë':

—¡Yöl-la' ba li', rinná bé'enu' bönachi judío!

19 Gula'guínë' gui icjë', en bulu'chejë' Lë' zxöna'. Bulu'zóa zxíbigaquië' lahuë', en lu yöl-la' rutitaj gulunë' Lë' bal.

20 Cate' budxi bulu'titjè' Lè', bulu'gúè' lari' xiná chul-la na' nácuè' ate' bulu'gácuè' Lè' lari' que cazè'. Ní'irö gula'chë'è Lè' ní'lö yúlalui' na' para tsöjda'gaquiè' Lè' lè'e yaga cruz.

Tu'dë'è Jesús lë'e yaga cruz

(Mt. 27:32-44; Lc. 23:26-43; Jn. 19:17-27)

21 Gulunè' ga bi'è tu bönni' Cirene yaga cruz queè' Jesús, ridödisè' ni' suzè'è la' guixi'. Lè' Simón, xúzgacabi' Alejandro, en Rufo.

22 Gula'chë'è Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'.

23 Gulu'è le guí'jè' Jesús xisi uva nutsi' nöri silá' que yaga mirra, pero Lè' biti' gu'è le.

24 Ní'irö bulu'dë'è Jesús lë'e yaga cruz, ate' gula'guísiè' lari' nácuè', le gula'zí' que queëgaquiè' bönni' na' röjáquiè' gudil-la. Bulu'béajè' le gaca bè' para ila'nözinè' bízxilö idela' que queëgaquiè'.

25 Naca idú xsila cate' bulu'dë'è Lè' lè'e yaga cruz.

26 Didza' na' bulu'zóè' lë'e yaga cruz ícjalè' Jesús ca naca le tu'quíè' Lè' rnna caní: "Bönni' Rinná Bé'enè' Bönachi Judío."

27 Bulu'dá'lenè' Jesús tsözxön lë'egaca yaga cruz chopè' gubán, tuè' cuita lè'è ibèla, en ia'tué' cuita lè'è yögöla.

28 Caní guca lë na' nazúaj lu guichi lá'ayi, rnna: Gubábalenè' bönni' tuá' dö'.

29 Yugu' bönni' ta'dödè' ni' tu'lidza zi'è Jesús, en tu'tá ícjagaquiè', ta'nnè':

—¡Ön! ¿Naru' uquínnajtso' yudo' queè' Dios, ate' tsonna dzasö uchísatsu' le?

30 ꞑBusölá cuinu' na'a, en bötaj lë'e yaga cruz na'!

31 Lësca' caní yugu' bixúz unná bë', en yugu' bönni' yudo' usedi tu'titjë' Lë'. Të' luzá'agaquië' tuë' ia'tué':

—Bönachi yúbölö busölë', pero biti' gaca usölá cuinë'.

32 Ta'nnë' ca':

—ꞑÖn! ꞑNácatsu' Cristo, Bönni' Inná Bé'enë' Bönachi Israel? ꞑBöttjatsöca' na'a lë'e yaga cruz para ilë'etu', ate' tséajlë'ëtu' Li'!

Yugu' bönni' na' dá'gaquië' tsözxön len Lë' lë'egaca yaga cruz bulu'lidza zi'ë ca' Lë'.

Le guca cate' gútië' Jesús

(Mt. 27:45-56; Lc. 23:44-49; Jn. 19:28-30)

33 Cate' bidxín idú huagubidza, guchul-la idútë yödzölió. Guca caní ga bidxintë idú ridödi xihuó.

34 Idú ridödi xihuó na' bë'ë Jesús zidzaj didza', rnnë':

—Eloi, Eloi, ꞑlama sabactani?

Didza' hebreo ni rna lu didza' xidza': Dios quia', Dios quia', ꞑbizx que nubéaj lãdxu'u neda'?

35 Yugu' bönni' nacu'ë ni' bila'yönnë' didza' ni, ate' ta'nnë':

—Buli'zëtsöca' nágali'. Elías rulidzë'.

36 Ní'irö guxíti'ë tu bönni' nútsë'ë lãdjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cöztsöca'ru', uyuru' channö huidë' Elías uzötjë' Lë'.

37 Gurödxi'ë zidzaj Jesús, en la' gútitë'.

38 Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö.

39 Bönni' na' rinná bé'enë' bönni' röjáquië' gudil-la zuínë' lahuë' Jesús, en bilé'enë' ca na' guca gurödxí'ë Jesús, en la' gútitë', ate' gunné':

—Le nácatë bönni' ni gúquië' Zxí'inë' Dios.

40 Nacuá'anú ca' ni' nigula, zí'tu'sö tu'yunu. Nútsa'gacanu ladjagacanu María Magdalena, en Salomé, en María, xiná'agacabi' Jacobo cuidi', en José.

41 Nigula ni yójacalennu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anú ca' ni' ia'bál-lanu nigula zían gula'zá'lennu Lë' lu yödzö Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn. 19:38-42)

42 Chizá' ral-la, en naca dza tu'pë'ë, dza si' idxín dza lá'ayi quégaquië' bönni' judío.

43 Que lë ni na' bidë' José, bönni' yödzö Arimatea, bönni' lo ladjagaquië' bönni' yúlahui' lo. Ribözë' ca' dza idinná bë'ë Dios. Idú ládxë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús.

44 Bubábinë' Pilato tu' gunné' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús.

45 Cate' biyönnë' ca na' gunné' bönni' na' rinná bé'enë' bönni' röjáquië' gudil-la, bë'ë José lataj u'ë Jesús.

46 Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e guí'a guiöj. Budë'ë tu guiöj blaga zxön ga nu riyaza ba na'.

47 María Magdalena, en María, xinë'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

¹ Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'z'ínu yugu' le rilá' zxixi para tsöjlú'ugacanu Jesús.

² Ni' naca zílado' dza risí lo, yöjácanu ra' yeru ba queë'. Bila'dxinnu ni' cate' si' gulén gubidza.

³ Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

⁴ Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxon naca.

⁵ Gula'yú'unu yeru ba lë'e guí'a guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rö'öbi' tsölä'a ibëla lu yeru ba na', nácubi' lari' tunna chiguíchido'os. Guládxide'enu.

⁶ Ní'irö bi'i na' gúdxibi' légaacanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'.

⁷ Guli'tséaj na'a, guli'tsöjtíxjöi'i ca' yugu' bönni' usëda queë', enca' Pedro. Guiéli' légaquië': "Tsejë Jesús luyú Galilea zí'alö ca libí'ili'. Ni' ulé'eli'-në' ca na' chigudxi cazë' libí'ili'."

⁸ Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Rulu'i lahuë' Jesús lonu María Magdalena

(Jn. 20:11-18)

9 Cate' bubanë' Jesús zílado' dza na', buluí' ilahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu.

10 Guyéajnu yójtíxjöi' inu nupa na' gula'dalen Jesús. Nupa ni ta'sëbi ládxi'gaca, en ta'bödxi yechi'.

11 Cate' bila'yöni didza' ru'ínu, zoë' nabanë' Jesús, ate' bilé'e quézinu Lë', biti' gula'yéajlë' lënu.

Chopë' bönni' usëda queë' Jesús tu'lé'enë' Lë'
(Lc. 24:13-35)

12 Gudödi na', nadzá'alö buluí' ilahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guixi'.

13 Ní'irö bulu'dxinë', dutíxjöi'iguequinë' ia'zica'rë', ate' ni xtídza'gaquië' biti' gula'yéajlë'ë.

Le rigü'ë Jesús lu ná'agaquië' bönni' gubáz queë'
(Mt. 28:16-20; Lc. 24:36-49; Jn. 20:19-23)

14 Ga yöjsetë, buluí' ilahuë' Jesús lógaquië' idx-inéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'.

15 Ní'irö gudxë' légaquië', rnnë':

—Guli'tséaj iduté yödzölió tsöjenli' libán que didza' dxi'a lógaca yúgu'të bönachi.

16 Nu tséajlë' neda', en idila nisa, ulá nu na', pero nu biti' tséajlë', irugu que gati nu na'.

17 Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a.

18 Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, biti' bi

gun quégaquië'. Ila'xóa nē'ē nupa te'e, ate' ulu'huöácátë.

Ruhuëpë' Jesús yehua' yubá

(Lc. 24:50-53; Hc. 1:6-11)

¹⁹ Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'.

²⁰ Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le nácgaca bë' naca idútë li didza' tu'ë. Ca' naca.

Didza' cubi rucá¹ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25